

BAHEBERE,

TEMA YA BOTSHELELA ³

♪ Moso o mobotse, bagwera. Ke monyetla go ba fa. Le—le go phethagatša boitsebišo bjo bogolo bjo go tšwa go modiša wa rena ka nnete go tla tsea bophelo bja kgontha, a go ka se? Kafao re neela theto go Morena bakeng sa maatla a phodišo a magolo a Gagwe le dikgaogelo tša Gagwe tše A re filego go theoga go kgabola mengwaga.

Bjale ke ne ditsebišo di se kae go dira. E tee, rena, Ngwanešu Wood le Ngwanešu Roberson, gomme re nyaka go le leboga bohole go re rapedišeng, bakeng sa leeto le le bolokegilego. Re bile le nako ya go kgahliša; re nno ya matšatši a mane le seripa sa matšatši, ke a dumela, gomme morago gape go bolokegeng. Morena o ile a re šegofatša.

⁵⁰⁶ Bjale, re tsebiša gore Ngwanešu Graham Snelling, tsošeletšo ya gagwe, e tšwelapele, godimo ka ma—ma mafelelong a Brigham Avenue, ka . . . ka toropongkgolo fa. Gomme Laboraro le le tlago bošego . . . ke nyaka go tloga gosasa, ka morago ga tirelo ya poloko bakeng sa yo mongwe ke tla tsebišago mo dinakwaneng di se kae. Re tla le dira le tsebe Laboraro bošego. Re nyaka go ya ka boemedi, bohole, godimo go etela Ngwanešu Graham pele a tswalela tirelo ya gagwe godimo fale. Gomme re tla leka go tlisa kereke ka moka mmogo, ge re ka kgona, gomme ra ya bjalo ka boemedi go kopana, go ba le Ngwanešu Graham go ye nngwe ya ditirelo tša gagwe.

⁵⁰⁷ Gomme, bjale, morago ga sekgalela se kua—kua go moagong wa mmušara ka Charlestown, ke mo—mo Mdi. Colvin, yoo a kilego a tla kerekeng fa mengwaga ye mentši ya go feta, bogolo bja mengwaga ye masomešupa nne, o tlogetše bophelo bjo go ya go ba le Morena Jesu. Gomme poloko ya gagwe e ya go rerwa ka Mošupologo, ke Moruti Mna. McKinney, o be a fela, peleng, modiša wa kereke ya Methodist ka—ka Port Fulton lebaka la mengwaga ye mentši, yo a bego a le mogwera wa bona wa sebele. Gomme ke ba go mo thuša, Mošupologo, ka, ke a dumela seripagare sa pele, ka—ka ntlongthapelo ka Charlsetown, Indiana. Gomme bohole ba lena bagwera ba lapa la Colvin le tla, ke a tseba, le tla thabela bjale feela tutuetšo goba go . . . go dumedišwa go gonnnyane. Gobane bohole re a tseba se seo se lego, rena re bilego tlase go kgabola yela, ka meeding, renabeng, le go tseba se go lego go lahlegelwa ke mogwera. Gomme kafao re . . . O robetše n—n ntlongthapelo bjale, ka Charlsetown, Indiana. Ge le ka ya godimo morago ga

sekgalela se, gabaneng, go tha thabelwa ke lapa la Colvin, ke ne kgonthe. Bontši bja batho ba bona ba tla fa tabarenekeleng le bjale. Ke nyadišitše, bolokile, kolobeditše, gabotse go nyakile, lapa la bona, ka moka. Gomme kafao Mna. Grayson, yoo a bego a le moagišani wa rena thwi fa, ke rammusara godimo fale.

⁵⁰⁸ Gomme gona ye, bosegong bjo, Morena ge a rata, moo re tlogelago mosong wo, re tla leka go topelela bosegong bjo, ka go thuto ye kgolo ye yeo re ithutago bjale. Gomme ke a nagana tše o e be e le ditsebišo, bokgole bjo—bokgole bjo ke—ke tsebago. Gomme Laboraro le le tlago bošego, bjale, re tla tsebiša bosegong bjo re yago godimo go ba le Ngwanešu Graham.

⁵⁰⁹ Gomme re amogela basetsebje bohle ka dikgorong tša rena. Gomme re thabile go ba le lena fa mosong wo, le go rapela gore Modimo ka go fetišiša o tla, ka bontši, go le šegofatša lehono bakeng sa kgobokano ye.

⁵¹⁰ Ngwanešu Cox o sa tšo mpotša gore ditlabele tša go bolediša batho di be di sa šome gabotse kudu nakong yeo. Ke mohlomongwe, mohlomongwe go ya ka boso, bontši bja go thapa ka go dipikara fale. Gomme ga di gabotse kudu, le go thoma, kafao seo e ka no ba sehlolabothata.

⁵¹¹ Gomme ke bona kgaetšedi a dutše fa yoo ke mo tsebago, Kgaetšedi Arganbright, ke . . . Se ga se gabotse le—le mekgwa, go botšiša se, eupša a o kwele go tšwa go Ngwanešu Arganbright ge a sa le a bile mošola? Ke ne kgahlego kudu go kweng go tšwa go yena ka pela ge re ka kgona. O ka Switzerland le Jeremane, ka kopanong godimo fale le Ngwanešu Tommy Hicks le Paul Cain. Ge o ka tsoge wa kwa, Kgaetšedi Ruth, o ntsebiše ka bonako, feelsa ka pela ge o ka kgona.

⁵¹² Bjale, tabarenekele ye nnyane ga e ne boleloko, eupša re ne kopanelo. Ga re ne thutotumelo eupša Kriste, ga go molao eupša lerato, ga go puku eupša Beibele. Ke Puku e nnoši yeo re e tsebago, gomme selo se nnoši re se tsebago, bjale ka ge re ne naso. Bjalo ka ge Madi a Jesu Kriste a re hlatswa go tšwa dibeng tšohle, re ne kopanelo seng sa rena, yo mongwe le yo mongwe.

⁵¹³ Ke be ke lemoga, mosong wo, go ba bangwe ba lena batho le ka be le kwele ngwanešu a rapela. Yola e be e le Mokatoliki, kafao, goba Mokatoliki wa maloba. Gomme re ne mehuta ya go fapania ya batho ba tlago fa. Ke no bile le monyetla, dinakwana di se kae tša go feta, go šikinya seatla sa ngwanešu wa Mennonite yo a dutšego ka fa. Gomme go tšwa go Mamennonite, go tšwa go Mamethodist, go tšwa go Mabaptist, le Katoliki, goba e ka ba mang a ratago, anke ba tle. Gomme re ne kopanelo mmogo go dikologa ditšhegofatšo tša Lentšu la Modimo. Go duleng go ba gona ke Hlatse ya Jehofa le mehuta ya go fapania ya batho, kafao, ba dikerekemaina tša go fapania.

⁵¹⁴ Ke be ke fela ke rata (gabotse, ke a dira le bjale) Bodikela. Ke rata dipere le dikgomo. Ke nno godišetšwa polaseng, gomme

ke—ke a go rata. Gomme re be re fela re eba le mokgoboketšo, gomme ke be ke tla ya le bona. Gomme re bile le legora la go hlehla. Ga ke tsebe ge eba lena batho ba Bohlabela le tseba se legora la go hlehla e lego, goba aowa. Ke ge le bea dikgomo ka se—se sethokgweng, gomme la ba le legora go di thibela go hlehla se ba se biditšego, go bowa morago tlase go dipolasa. Di be di tla ja bjang, moo ba godišago bjang bakeng sa phepo ya marega. Gomme gona morago godimo ka thabeng, ba ne gape magora a go hlehla, moo ba aroganyago ditshadi le ditona tše dintši kudu, le go ya pele. E bitšwa legora la go hlehla. Eupša legorakgolo la go hlehla ke moo molemiši a emago ge dikgomo di eya go kgabola.

⁵¹⁵ Gomme bjale ke dutše fale, letšatši le lentši, mo saleng ya ka, gomme ke ba bogetše ge dikgomo di tla ya go kgabola. Go be go ne mehuta yohle ya go fapano ya mekibo e tsenego. Go be go ne tše dingwe di bitšwa “Diamond.” Le tše dingwe tša tšona di bitšwago “Bar X.” Le tše dingwe . . . Tša rena e be e le “Tripod,” se sengwe go swana le leswao la Boy Scout. Moisa wa go latela, ka tlase ga yona, e be e le “Turkey Track,” mo godimo ga pere. Gomme di bile le mehuta yohle ya mekibo, go—go tseba dikgomo tša bona ge ba di gapela ntle.

⁵¹⁶ Bjale, molemiši o be a se ne kgahlego ke mokibo ofe ba bilego le ona, eupša sese sona, molemiši o be a ne kgahlego go šetša theke mo tsebeng ya tšona. Se sengwe le se sengwe se tsenego ka fale, ga go kgathale ke mokibo ofe o bilego, e be e swanetše go ba Hereford ya mmakgomathe. E be e ka se tsene ka fale ntle le ge e be e le Hereford. E be e swanetše go ba leruo le le ngwadišitšwego goba e be e ka se ye go kgabola.

⁵¹⁷ Ke a nagana, mo letšatšing leo ge Morena a etla, ga A ye go šetša ke mokibo ofe re o rwelego, eupša ge eba re bohole Bakriste ba ba tswetšwego gape. Yeo ke nnete. Leo ke leruo la Kriste. Teko ya Madi e ya go re netefatša, bohole re Bakriste. Gomme ge eba re ya go ba ka tsela yeo *fale*, bokaone re be ka tsela yeo fa. A ga le nagane bjalo? Ke ka tsela yeo, re leboga kopanelo yohle go tšwa dikerekeng tšohle.

⁵¹⁸ Bjale re bale ka go Puku ye ya go šegofala ya Bahebere. Ngwanešu yo mongwe o ipshinne ka yona kudukudu go fihla o tšere ditheipi gomme o dira puku ya tlhahlo ka ye.

⁵¹⁹ Bjale re ya go tla, gabotse ka pela, go tema ya 11. Re emetše go tšea marega go yeo, go tema ya 11. Go yo mongwe le yo mongwe wa baanegwa ba, re duma go ya morago go kgabola Puku le go tlemaganya Lengwalo ka moka mmogo. Ke be ke eya go e dira. Ke dira ka karolo, go ye nngwe ya ye, ya ditema tše tša go feta, go hwetša Puku ka moka e tlemilwe mmogo. Gobane, le a bona, Lengwalo le swanetše go netefatša Lengwalo.

⁵²⁰ Kagona, ge eba go ne thulano e rilego, yeo e ka ba mang a ka naganago gore Mangwalo a thulana seng sa ona, yeo ke phošo. Ga go ne Lengwalo le thulanago le Lengwalo. Thu—thu thulano

ke moo gore mohlomongwe Le thulana le tsela ya rena ya go Le lebelela, eupša ga Le thulane Lonamong. Ke bile ka go bodiredi, ke ya go mengwaga ye masomepedi tshela bjale, gomme ga nka ka tsoge, nako e tee, ke hweditše selo se tee ka Beibeleng seo se thulanago le e ka ba eng gape e ngwadilwego ka Beibeleng. Gomme ke—ke no tseba ga e gona.

⁵²¹ Gomme lehono re ithuta ka go ye nngwe ya ditema tše šegofetšego kudu tša Bahebere, tema ya 7. Gomme ga go ne e ka ba mang a se nago Beibele, a ka ratago go re latela ka go baleng, re tla thakgala go go tlišetša Beibele ge o ka no phagamiša seatla sa gago. Ke tla ba le bagolo ba bangwe, yo mongwe, a tle fa le go tsea tše dingwe. Yo mongwe ba phagamiša diatla tša bona morago fale. Gomme ke a go leboga, ngwanešu. Gomme ge eba o nyaka Beibele, nno phagamiša seatla sa gago, gomme ba tla e tliša go wena.

⁵²² Bjale, tsela e nnoši yeo kereke e ka agwago, tsela e nnoši yeo motho a ka bago le Tumelo, ga se ka kerekeneleina ya gagwe, e sego ka boingwadišo bja gagwe. Eupša Tumelo ya gagwe e ithekgle godimo ga thutamodimo ya dikgopololo tša monna tsoko, gobane e, bontši goba bonnyane, ka moka ke motho. Eupša tsela e nnoši Tumelo e ka hwetšago lefelo la yona la go khutša la go kgwahla, ke godimo ga Lentšu la Modimo le sa šuthego le go se fetoge. “Tumelo e tla ka go kwa, go kwa Lentšu.” Ke ka fao e tšeago. Gomme—gomme ge Tumelo e kwelwe gomme e amogetšwe, e dudišegile neng le neng. Ga se gona gape se ka tsogego sa e šuthiša, ga go kgathale ke eng e tlago goba e sepelago. Ga se gona se ka tsogego sa fetola Tumelo yela. Naganang ka seo. O kgwapareditše, gomme ga o sa fetoga gape, bakeng sa nako le Bokagosafelego. O kgwapareditše neng le neng, “Ka gore Modimo, ka sehlabelo se tee, o phethagaditše neng le neng bale bao ba hlatswitšwego, goba ba biditšwego.”

⁵²³ Gomme Tumelo e ne lefelo le legolo bjalo ka go Mokriste, bophelong bja modumedi, gore e kgona go tsea leemo la yona ka lehlakoreng la lebitla la maraga goba godimo ga lepokisi, moo lesea le bohlokwa goba moratiwa a širogilego go tloga bophelong bjo go ya mošola. Gomme ka molebelelo wa go tsepelela wa leihlo la ntšhu, o kgona go lebelela go Yena yo a rilego, “Ke nna Tsogo le Bophelo.” Gomme ba lebala dilo tše di fetilego. Ba gatelela go mmaraka wa pitšo ya godimo.

⁵²⁴ Ke thakgetše kudu gore Modimo o neetše se sebjalo, gomme o se dirile mpho ya mahala go bohole. Ke seo dikereke di swanetšego go ba. *Dikereke* ga di re dikerekemaina goba mekgahlo; go ra, “Dihlopha tša batho, tša badumedi, bao ba kgobokanego mmogo ka tlase ga kopanelo ya Lentšu.”

⁵²⁵ Gomme ka go thuto ye ya go kgahliša fa ya Mokgethwa Paulo, ka mabokamorago, ka go ditema di fetilego, o be gabotse a mekamekana le Bomodimo bja go phagama bja Morena Jesu le

yo A bego a le. Kriste o be a le Modimo, a dirilwe gore batho ba kgone go Mo kwa le go Mo kgwatha, le—le go kopanelo le Yena. Kriste, Morena Jesu, o be a le mmele woo Modimo a dutšego ka go ona, “Modimo o dirilwe nama gomme o dutše magareng ga rena.” Timotheo wa Pele 3:16, “Ntle le ngangišano sephiri sa bomodimo ke se segolo, gobane Modimo o bonagaditšwe nameng.”

⁵²⁶ Jehofa yo mogolo o theogetše tlase gomme a dirwa go kgathwa, ka go phela ka mmeleng wa Morwa wa Gagwe Mong, go tsebiša le go boelanya lefase go Yenamong. Modimo o be a se selo . . . Kriste o be a se selo sa go hlaetša Modimo, gomme—gomme Modimo o be a se selo sa go hlaetša Kriste. Bobedi mmogo ba dirile Modimohlogo mmeleng, a dirilwe tlasana gannyane go feta Barongwa, gore A kgone go tlaišega. Barongwa ga ba kgone go tlaišega. Jesu o be a le Tabarenekele yeo Modimo a dutšego ka go yona.

⁵²⁷ Beibele e rile, ka go tema ya 7 ya Ditiro tša Baapostola, gore, “Ditabarenekele, le tshungwa- . . . sehlabelo le meneelo ya go tshungwa Wena ga o di nyake, eupša O ntokišeditše Mmele. Golebjale Yo Godimodimo ga a dule ka ditabarenekeleng tša go dirwa ka diatla, eupša O Ntokišeditše mmele,” gore go ageng goba go duleng ka go kopanelo le motho.

⁵²⁸ Modimo o a dumelela, ka pela ge re feditše ka tema ye fa, goba re feditše ka Puku ye, re nyaka go ya morago le go topa Puku ya Ruthe gomme re bontšhe ka fale gore ka fao Modimo a bilego wa leloko le rena, go boelanya balahlegi morago go Yenamong ka kopanelo le go beng yo mongwe wa rena. Molopolodi o swanetše go ba wa leloko, gomme tsela e nnoši yeo Modimo a kgonnego go ba wa leloko go rena, ke go ba yo mongwe wa rena. Kafao, ga se A kgona go ba Morongwa le go ba wa leloko go motho.

⁵²⁹ Mantšiboeng a go feta ge ke be ke bolela go morwa morobegapelo, modirišane wa ka, wa mme yoo a sa tšogo feta, o rile, “Oo Ngwanešu Bill, ke a thanka yena ke Morongwa bošegong bjo.”

⁵³⁰ Ke rile, “Aowa, Earl. A ka se tsoge a bile Morongwa. Yena ke mosadi, bošegong bjo, feela boka Modimo a mo dirile, gomme o tla ba ka mehla, a ka se tsoge a ba Morongwa.” Modimo o dirile Barongwa. Ga sa nke a dira batho go ba Barongwa. O dirile Barongwa le batho. Kafao batho ba ka se tsoge ba ba Barongwa, le Barongwa ba ka se tsoge ba ba batho. Modimo o ba dirile go fapano.

⁵³¹ Bjale, gomme ka go Kriste go beng nama go phološa go tšwa go mošola wo mogolo moo motho a welego, le go se hwe gola ka sebe go theogetše tlase, Modimo o theogetše tlase gomme o tšere sebopego sa lebopo la motho, le go ba wa leloko go rena, gore A kgone go rwala dibe tša rena le lehu la rena.

⁵³² Gomme ka go ye nngwe ya ditšhupetšo re bego re di fa, ka go dithuto tša go feta; feela bokamorago bjo bonnyane gore

bosetlaboswana ba kwešiše. Modimo, mo tseleng ya Gagwe go rotogela Khalibari, ge lebola la lehu le be le godimo ga Gagwe, gomme le bobola go Mo dikologa, gomme mafelelong e Mo lomile go fihla A ehwa. O hwile go fihla letšatši le tlogela go phadima. O hwile go fihlela ngwedi le dinaledi di sa fe seetsa sa tšona.

⁵³³ Gobane, ka fao A bego a swanetše go dira seo, go kgwaparetša lebola la lehu! Ge nkabe A bile motho mosehwe, ge nkabe a bile ka go theophany, goba a bile ka moyeng, lehu ga le ne taolo go seo. Go be go swanetše go ba nama, gore A kgone go tsea lebola la lehu. Eupša ge nosi goba khunkhwane ye e lomago, e kile ya tsetsemetša go teba, a ka se tsoge a tsetsemetša gape. O tlogela lebola la gagwe ka nameng. Gomme seo ke Kriste a bi-... goba Modimo a bilego. Kriste o agile ka nameng, gore A ke a kgwaparetše ka nameng ya Gagwe Mong lebola la lehu. Gomme ge lehu le gogetše go tloga go Yena mo sefapanong, le šiile lebola la lona, le ka se kgone go tsetsemetša modumedi gapegape. Le ka no dira lešata la go hama, le ka dira go bobola le tšošetšo, eupša le ka se tsetsemetše. Ga le na lebola.

⁵³⁴ Yo mogolo Mokgethwa Paulo, matšheng wa gagwe wa lehu, o goeeditše gomme o rile, “O lehu, lebola la gago le kae? Gomme lebitla, phenyo ya gago e kae? Eupša a go lebogwe Modimo Yo a šetšego a re file phenyo ka wa rena Morena Jesu Kriste, ka gore bobedi lehu le lebitla di le lahlegetšwe ke maatlal a lona.”

⁵³⁵ Bjale, gona, Lamorena la go feta re tšere, “Go tlogeleng dikokwane tša thuto ya Kriste,” ka go tema ya 6, re bala se, “a re yeng phethagalong.” Gomme re hweditše gore batho lehono ka dikerekeng tše dintši, mmogo le tabarenekele ya Branham le tše dingwe tša go fapano, re bea bontši kudu go go ithuta ka dikokwane tša Kriste: O be a le Morwa wa Abraham, O be a le Morwa wa—wa *Semangmang*, le go ya morago, mašika. Eupša Beibele e rile, “A re beeleng thoko dilo tše, gomme re yeng phethagalong.”

⁵³⁶ Sa pele o swanetše o tsebe thuto, gomme morago o swanetše go tseba dilo tšohle tše; morago a re di beeleng thoko, o rile, tše tsogo ya bahu, go beeng ga diatla, dikolobetšo, le dilo tšohle tše tša go hwa tša Modimo. Efela, ga—ga di ne Bophelo ka go tšona. Eupša kereke lehono e no ya pele go dilo tše, “Oo, re dumela go Bomodimo bja Kriste.” Ee. Kgonthé. “Re dumela go kolobetšo ya meetse.” Ee. Kgonthé. “Go beeng ga diatla.”

⁵³⁷ Paulo o rile, “Re tla dira sohle se ge Modimo a dumela. Eupša pele ga tšohle tša tše, a re beeleng thoko bjale, gomme re yeng phethagalong.”

⁵³⁸ Bjale, kereke e ka se phethagatšwe ka mekgatlo. E ya kgole go tloga go Modimo, nako yohle, goba kgole go tloga go bona seng. Re thala mellwane, re ikaroganya renabeng, go itaetša go hloka Tumelo. Eupša ge re tlogela dikokwane tšela tša thuto, ge

re ka šuthela go ya phethagaleng, gona dilo tšela tše dinnyane ga di be le mohola kudu.

⁵³⁹ Re ya ka setswalleng, gomme re hwetša gore tsela e nnoši yeo re ka phethagatšwago ke go ba ka go Kriste. Gomme re hwetša gona, ka dithuto go tšwa Beibeleng, gore ka fao re tsenago ka go Kriste; e sego ka kolobetšo ya meetse, e sego ka go beeng ga diatla, e sego ka thuto. “Eupša ka Moya o tee bohole re kolobeleditšwe ka Mmeleng o tee gomme ra phethagatšwa ka tlaišego ya Gagwe.” Gona, re lebelela go fapania. Re nagana go fapania. Re dira go fapania. Re phela go fapania. E sego ka gobane ke mošomo goba re ba kereke, eupša ka lebaka la “lerato leo Modimo a le adilego ka dipelong tša rena ka Moya wo Mokgethwa,” woo o re dira badudimmogo ba Mmušo wa Modimo, gona ga go sa na kerekela goba mellwane ka go seo. Bohle re Mmele o tee o mogolo.

⁵⁴⁰ Bjale re komana go tsena godimo ga thuto ya mosong, dinakwaneng di se kae. Selo se sengwe gape ke tla ratago go tla go sona fa, seo ke, gore, Paulo a bolela ka Pukung, ya ya 7, goba, tema ya 6, re hwetša fa gore re phethagatšwa ka go Kriste. Gona ka go temana ya 13 ya tema ya 6, feela bokamorago bjo bonnyane.

*Ka gore ge Modimo a dira tshepišo go Abraham,
gobane O be a ka se ene ka yo mogolwane, o enne ka
yenamong,*

Modimo o enne ka Yenamong, gobane O be a ka se ene ka yo mongwe yo mogolwane.

⁵⁴¹ Bjale re nyaka go ya morago. A re yeng go Bagalatia feela dinakwana di se kae. Phetlang morago go Puku ya Bagalatia, gomme etlang go Bagalatia 3:16. Gomme re tla bala fa feela nakwana, ka se A ennego ka sona.

*Bjale tshepišo e dirilwe go Abraham le peu ya gagwe.
Ga se a re, Le go dipeu, bjalo ka tše dintši; eupša bjalo
ka e tee, . . . go pe peu, e lego Kriste.*

⁵⁴² Bjale ge le ka lemoga, go baleng seo kgauswi bjale, ge le bala. . . . go Abraham le peu ya gagwe (botee) ditshepišo (bontši) di dirilwe.

⁵⁴³ “Abraham le Peu ya gagwe.” Bjale, Peu ya Abraham e be e le e tee, e bego e le Kriste; go swantšengpele, Isaka.

Eupša Abraham o bile le bana ba bantši. O bile le o tee pele a eba le Isaka, a bego a bontšha go thedimoga ga gosedumele ga Sarah yo a nyakilego Hanna go tliša ngwana, a nagana gore o be a tšofetše kudu, gomme Modimo go tlathoko le go dira tsela tsoko ye nngwe go tšwa go tsela yela A tshepišitšego go e dira.

⁵⁴⁴ Eupša Modimo o boloka tshepišo ya Gagwe. Ga go kgathale e bonala go se hlaologanyege gakaakang, Modimo o tlemegile go tshepišo ya Gagwe. Gomme Sarah o naganne gore mohlomongwe

a ka ba le Hanna, goba, Hagara, a ke re, moledi wa gagwe, go belega lesea ka Abraham, gomme o tla le tšea. Gomme yoo o bile Ismaele, yo abilego mootlwa mo nameng, go tloga nako yeo go fihlela bjale. O sa le mootlwa ka nameng, gobane go tšwa fao go tla Maarapo, gomme ka mehla ba bile ka tsela yeo.

⁵⁴⁵ Bjale, nako efe kapa efe yeo o sa dumelogo Lentšu la Modimo la go se apešwe le go gokarela tsela tsoko ye nngwe, e tla ba mootlwa ka nameng ya gago go tloga fao go ya pele. O no tšea se Modimo a se boletšego. Ge A E boletše, seo e no ba se A se rago. Oo, a go šegofatšwe Leina la Gagwe! Nno tšea Lentšu la Gagwe.

⁵⁴⁶ Ga go kgathale ke eng elekago go e tlathoko, ya re, “Gabotse, ka kgonthe ga Le re Seo.” Le ra feela se Le se rago, ge Modimo a dira tshepišo.

⁵⁴⁷ Bjale ge re ka lemoga sekgauswi.

...Abraham le peu ya gagwe ditshepišo di...

E tee e be e le Peu, botee, gomme ye nngwe e be e le ditshepišo. Go ne tshepišo ya go feta e tee, le motho wa go feta o tee yoo a akareditšwego ka go Peu ya Abraham. Le a bona? Go ne Peu e tee, eupša batho ba bantsi ba Peu ye. Le a bona? Ba be ba sa no ba Abraham a nnoši, goba go Isaka a nnoši. Eupša... E be e le go Peu yohle ya Abraham. Ditshepišo di dirilwe go ye nngwe le ye nngwe peu ya motho ka motho ya Peu yeo. Le a e hwetša? [Phuthego e re, “Amene.”—Mor.]

⁵⁴⁸ Kagona, rena, go beng go hwa ka go Kriste, go ya ka Mangwalo, re tšea Peu ya Abraham gomme re bajabohwa go ya ka tshepišo. E sego ka go tšoena kereke, goba go bopeng ga dilo tša go hwa, goba—goba go ya pele. Eupša ka go tswalweng ga Moya wo Mokgethwa, re Peu ya Abraham, gomme re bajabohwammogo le Yena ka Mmušong.

⁵⁴⁹ Gona re ya pele, go baleng, gona, feela pejana gannyane bjale, “Modimo a dira keno.” Bjale temana ya 17 ya tema ya 6.

Moo Modimo, a rata kudu go fetišiša...

...Modimo, a rata kudu go fetiša go bontšha go bajabohwa ba tshepišo go se šitwe ga bohlale bja gagwe, o e tiiseditše ka keno:

⁵⁵⁰ Oo, a re no khutšang bjale metsotsa e se mekae. “Modimo a rata kudu.” E sego gore O be a swanetše, eupša go dira se selo sa kgonthe.

⁵⁵¹ Bjale, re šetše re hweditše gore Modimo o bile nama, o agile magareng ga rena, kafao gore O iponagaditše Yenamong go lefase. Ge A hweditše mosadi bootsweng, o rile, “Ga Ke—ga Ke go ahlole. Eya, se sa dira sebe gape.” Ge A hweditše balwetši, O dirile feela ka tsela ye A ka bego a dirile, gobane O be a le Modimo, gomme O—O fodišitše balwetši. O tsošitše bahu. O lebaletše dibe. Ga go kgathale ba be ba le bjang, le ke ba bakae,

le ka fao ba kgelogilego, O ba swaretše, golebjalo, ge ba be ba rata go tla le go kgopela.

⁵⁵² Bjale hlokamelang. Ge Modimo a dirile ka tsela efe nako ye nngwe go seemo se itšego, gomme ge seemo seo sa go swana se tsoga gape, O swanetše go dira lekga la bobedi boka A dirile nako ya pele goba ga A loka. Le a bona? Ga go kgathale ke gampe gakaakang o lego ka sebeng, o ka ba go šwahlamela gakaakang, O swanetše go dira go wena boka A dirile mosadi yola wa go wa goba O dirile phošo nako yela. Maitshwaro a Modimo ke Motho wa Gagwe, gomme se A lego ka go maitshwaro a Gagwe se tsebagatša Motho wa Gagwe.

⁵⁵³ Gomme ke ka tsela ye o lego, ka maitshwaro a gago a bophelo, a bolela se o lego. Bjale ka ge re bile le go kgabola, thuto goba tše pedi go feta, batho ba Methodist ba nyakile go tsebagatša, "Ge o goelela, o O hweditše." Mopentecostal o re, "Ge o boletše ka maleme, o O hweditše." Mošikinyi o rile, "Ge o šikinya, o O hweditše," Bašikinyi ba Pennsylvania. Gomme re hwetša gore bohole ba fošitše. Bophelo bja gago bo a O tsebagatša. Motho wa gago o tsebagatša se o lego. Motho o tsebjja ka mediro ya gagwe, le e ka ba eng bophelo bja gago bo lego.

⁵⁵⁴ Le kwele kanegelo ya kgale, "Bophelo bja gago bo bolela godimo, ga ke kgone go kwa mantšu a gago." Kafao e ka ba eng o lego, o sona. Bophelo bjo o bo phelago bo bontšha ke mohuta ofe wa moyo o lego ka go wena.

⁵⁵⁵ Gomme gona o ka no ekiša selo sa go fošagala, goba, wa ekiša selo sa go nepagala, anke ke bolele. O ka no ekiša Mokriste. Eupša o tla, ge go eya, go tla nako ge kgatelelo e tla bewa, gona e tla bontšha se o lego. Ketane e tiile kudu go makopanyo a yona ao a fokolago kudu.

⁵⁵⁶ Ge Kriste Morwa wa Modimo a beilwe tekong, go bontšhitše se A bego a le. Kgonth. Ge o bewa tekong, go tla netefatša se o lego. Bophelo bja gago ka mehla bo hlagiša se se lego ka teng ga gago. Ge go eya, eba le kgonth dibe tša gago di tla go hwetša. Gomme ke seo re lekago go se bolela.

⁵⁵⁷ Jesu o rile, ka go Mokgethwa Johane 5:24, "Yo a kwago," e sego yo a šikinyago, yo a bolelago, yo a . . . "Yo a kwago Lentšu la Ka, gomme a dumetše go Yena yoo a Nthomilego, o ne Bophelo bjo Bosafelego, gomme a ka se tsoge a tla kahlolong; eupša o fetile lehung go ya Bophelong."

⁵⁵⁸ Ke tumelo ya gago. Gomme tumelo ya gago, e boletšwe ka dipounama tša gago, e dira go bonagala go batho bao ba kgonago go kwa, eupša bophelo bja gago bo phatlalatša go bohole. Kafao, ga go kgathale o leka gakaakang go dira *se* le go dira *se*, go ka se tsoge gwa šoma. Go swanetše go ba ka go wena. Woo ke moko wa kgonth wa kanegelo ka moka. Tumelo ya gago ya sebele ka go Kriste yo a tsogilego, bjalo ka Mophološi wa gago; gore O ka seatleng se setona sa Modimo, a dira legatong la gago mosong

wo, bjalo ka ge o dira legatong la Gagwe tlase fa bjalo ka hlatse. Hlatse ke go dira sebakeng sa yo mongwe, go go emela bjalo ka hlatse. Gomme bjalo ka ge bophelo bja gago bo hlagiša fa se bopaki bja gago e lego ka go Kriste, bo hlagiša fale gomme bo hlagiša fa. Gomme Yena o godimo fale, bjalo ka se A lego bakeng sa gago, a hlagiša bobedi fale le fa. Kafao wena o . . . Ka tumelo ya gago, o phološitšwe, gomme yeo e nnoši. Kafao, dikwi, maikutlo, go ikwela, e ka ba eng, ga di ne lefelo le gannyane go Yona. Bjale, aowa . . .

⁵⁵⁹ Bjale, le se naganeng go fošagala, gore ga ke dumele go maikutlo a. Ka nnete. Eupša se re lego go sona bjale, go leka go nanganela go batho ba ba letšatši le, ga se maikutlo. Diabolo o tšere dilo tšeо gomme o hlantšhitše batho, go ba dira ba thee boyo bja bona bja Gosafelego godimo ga maikutlo. Go goelela, go bolela ka maleme, go ya kerekeng Lamorena le lengwe le le lengwe, go itshwara bjalo ka Mokriste, seo se ka se be le taba efe mo letšatšing lela. “Ntle le ge motho a tswetšwe gape.” Gomme bophelo bja gago bo hlagiša se o lego ka teng, le a bona, e sego maikutlo a gago.

⁵⁶⁰ O ka ba le madi diatleng tša gago, o ka bolela ka maleme, o ka fodiša balwetši, o ka šuthiša dithaba ka tumelo ya gago, gomme ga o selo golebjalo. Bakorinthe ba Pele 13. Le a bona? Go swanetše go ba se sengwe se diregile ka Tswalo ye e tšwago go Modimo, gomme Modimo o tliša Tswalo ye mpsha go wena, le go go fa karolo ya Yenamong. Gona dilo tšeо ke tšona. O tlholo ye mpsha. “Ke ba fa Gosafelego.”

⁵⁶¹ Re ile go kgabola lentšu “Gosafelego.” *Neng le neng ke “sekgala sa nako.”* Bokagosafelego ke neng le neng, neng le neng le neng le neng, eupša go ne Bokagosafelego go go tee. Gomme re hwetša gore o amogela Bophelo bjo Bosafelego, gomme lentšu ka Segerike ke Zoe, le rago “Bophelo bja Modimo.” Gomme o amogela karolo ya Bophelo bja Modimo, ye e go dirago morwa wa semoya wa Modimo, gomme o no ba gosafelego boka Modimo a le gosafelego. Ga o ne bofelo, ga go lefelo go emiša, gobane ga se o be le lefelo la go thoma. Eng kapa eng e nago le mathomo e ne bofelo, gomme seo se se nago mathomo ga se ne bofelo.

⁵⁶² Re rata Lentšu lela le bohlokwa gakaakang! Mokriste o swanetše go tsengwa ka go Tumelo yela e kilego ya fiwa bakgethwa gatee, gomme a se tšokatšokišwe, lefelo go ya lefelong, le go tšoena dikereke tša go fapana. Kereke e ka ba efe o nyakago go ba wa yona go lokile, ge feela o le Mokriste. Eupša sa pele bea selo sa pele, e lego Tswalo yela yeo e go dirago wa leloko go Modimo, boka Modimo a bile wa leloko le wena.

⁵⁶³ O bile wa leloko, gore A ke a go tsoše. Pele A ka go tsoša, O swanetše go go fa Bophelo bjo Bosafelego. Gona Modimo o ile a swanela go ba wa leloko, go tšeа lehu, go go tsoša. Gona o swanetše go ba wa leloko go Yena, gore o ye ka tsogong. O bona

se e lego? E no ba go fetolelana. Modimo o bile wena, gore o ke o be Modimo. Le a bona? Modimo o bile karolo ya gago, nama, gore o ke ka mogau wa Gagwe o be karolo ya Gagwe, ke phetho, go ba le Bophelo bjo Bosafelego.

⁵⁶⁴ Feela seswantšho se sebotse, gomme, oo, re a se rata.

Bjale, *Modimo, a rata kudu go fetiša . . .*

⁵⁶⁵ O be a se a swanelo go, eupša O be a rata go. Ke thakgetše kudu ka seo, a ga le, gore Modimo wa rena o a rata? Lebelelang. Go ka reng ge nkabe A—go ka reng ge nkabe A se go pelofala? Kenywa ya Moya ke eng? Lerato, thabo, tumelo, khutšo, pelofalo. Yeo ke karolo ya Modimo yeo e lego ka go wena. Gomme e kgona go kgotlelana, go kgotlelana merwalo ya rena seng. Go swarelana seng, boka Modimo ka lebaka la Kriste a le swaretše. Moya wa Modimo ka go wena o go dira ka tsela yeo. Gomme gona ge Modimo a be a le fa mo lefaseng gomme a bile wena, a bile sebe, gore Yena go tšeeng sebe sa gago, o go rwaletše sona gomme o lefile kotlo bakeng sa sona. Modimo ke pelofalo, go kgotlelana merwalo ya rena.

⁵⁶⁶ Gomme gona Ke Modimo wa go loka. Ge o nyaka, dilo tše rilego tseleng ya gago, o a tseba, Modimo o lokile go lekanelo go dira seo. O rata go—go go dira o thabe. O nyaka go . . . Ke—Ke yena lerato, gomme lerato la Gagwe le legolo le Mo gapeletše ebile go theogela tlase nako ye nngwe, go go dumelela go ba le dilo tše o di nyakago.

⁵⁶⁷ Lebelelang Tomase, ka morago ga tsogo. Tomase o be a ka se dumele. Oo, o ne bana ba bantsi lehono. Eupša Tomase o rile, “Aowa. Aowa. Ke tla swanelo go ba le bohlatse bjo itšeego. Ke tla swanelo go bea diatla tša ka lehlakoreng la Gagwe, le la Gagwe . . . menwana ya ka godimo fa ka diatleng tša Gagwe, pele nka E dumela. Ke, ga ke kgathale se le se bolelago.” Le a bona, o be ka gohle a tšwile lenaneong la Lengwalo, thwi nako yeo. O swanetše go E dumela. Kafao o rile, “Ke swanetše go ba le mohuta tsoko wa bohlatse, go E netefatša.”

⁵⁶⁸ Gomme Jesu o tšweletše, O lokile, “Eta pele, Tomase, ge eba seo ke se o se nyakago, gabotse, ke wena yo. O ka ba le sona.”

⁵⁶⁹ Ke ka tsela yeo re lego. Re re, “Morena, ke swanetše go bolela ka maleme. Ke—ke swanetše go goelela. Ke swanetše . . .”

⁵⁷⁰ “Oo, eya pele, Ke tla go dumelela o be le yona.” O lokile.

⁵⁷¹ Kafao o tsentše diatla tša gagwe lehlakoreng la Gagwe, morago o rile, “Oo, ke Morena wa ka le Modimo wa ka.”

⁵⁷² O rile, “Bjale, Tomase, o a dumela ge e sa le o bone. Eupša ke wo mogolo gakaakang moputso wa bona ba ba se nago bohlatse golebjalo ba E dumela!” Ke lena bao. Ke moo re swanetšeego go fihla. “Moputso wa bona ke wo mogolo gakaakang ba ba sa bonago selo eupša golebjalo ba E dumela.” Ke tiro ya tumelo, gore re a E amogela.

⁵⁷³ Bjale, ke dumela maswao a latela badumedi, eupša a re beeng dilo tša pele pele. O ka ba le maswao, ntle le Ye. Paulo o rile o ka kgona. O rile, “Nka kgona go bolela ka maleme boka bobedi batho le Barongwa; ga ke selo. Nka kgona go šuthiša dithaba ka tumelo ya ka; ga ke selo. Nka kgona go kwešiša Beibele, ka tsela yeo nka kgonago go tseba diphiri tša Modimo; ga ke selo.” Le a bona, tšeо ke dimpho tša Moya wo Mokgethwa, ntle le Moya wo Mokgethwa.

⁵⁷⁴ Moya wo Mokgethwa ke Modimo. Modimo ke lerato, thabo, khutšo, pelofalo, boleta, kgotlelelo. Woo ke Moya wa Modimo. Ke seo Modimo a se tsošago matsatsing a mafelelo, ka Moya wola.

⁵⁷⁵ Bjale, “A sa rate . . .”

. . . *Modimo*, a rata kudu *go fetiša go bontšha go bajabohwa ba tshe tshepišo . . .*

. . . *Modimo*, a rata kudu . . . *go bontšha . . . bajabohwa . . .*

Ke bomang bajabohwa? “Rena, go hweng ka go Kriste, re tsea Peu ya Abraham, gomme re bajabohwa.” Oo, a seo se a nwelela? Re bajabohwa ba Mmušo wa Modimo, ka tshepišo ye e ennweego. Modimo o be a se a swanelo go ena. Lentšu la Gagwe le phethagetše. Eupša O enne, le gona, ka Yenamong, gobane go be go se yo mogolwane.

⁵⁷⁶ Bjalo ka ge re bala go ya pele, feela nakwana, theetšang.

. . . *tshe tshepišo ya go se šitwe ya bohlale bja gagwe, o e tiušeditše ka keno:*

⁵⁷⁷ “Go se šitwe,” wagosefetoge. Modimo ga a kgone go fetoga. O swanetše go dula a swana. Gomme ge Modimo a fodišitše motho o tee wa go babja, A ka se tsoge a fetola mokgwatebelelo wa Gagwe. Modimo o lebalela modiradibe o tee, mmalegogwana o tee, A ka se tsoge a fetola mokgwatebelelo wa Gagwe. Gosešitwe, Lentšu la Modimo la gosefetoge. Modimo o rile, lefelong le lengwe, “Ke nna Morena Yo a fodišago malwetši a lena ohle.” O swanetše go dula le Yona, gobane Yena ke tlhokamagomo. O tsebile bofelo go tloga mathomong.

⁵⁷⁸ Bjale, nka re, “Ke tla dira *se*.” Gomme Beibele e rile, re swanetše go re, “Ge Morena a rata.” Gobane, ke wagohwa. Ga ke tsebe. Dinako tše dingwe ke swanetše go gomiša lentšu la ka, eupša Modimo a ka se gomiše la Gagwe. Yena ke Modimo.

⁵⁷⁹ Gomme O kgopetše feela selo se tee, “Ge o ka kgona go dumela.” Oo, nna! “Ge o ka dumela, dilo tšohle di a kgonagala.” “Ge o ka kgona go dumela,” ke phetho. “Wena, ge o ka kgona,” seo potšišo. Eupša e sego potšišo go Lentšu la Modimo, gobane, go se šitwe ga Gagwe, A ka se fetoge. Go kgahliša bjang!

⁵⁸⁰ Bjale theetšang, ge re bala go theoga.

*Gore ka dilo tše pedi tša go se šitwe, ka go tšona go
lego go se kgonagale go Modimo go aketša, . . .*

Go se kgonagale! Go se kgonagale le go se šitwe ka kgonagalo ke lentšu le letee; ka se fetoge, ka se šuthe. E swanetše go dula go swana neng le neng. Ka se fetoge, go se šitwe le go se kgonagale.

*Gomme tše pedi, ka dilo tše pedi tša go se šitwe, ka go
tšona go sa kgonagalego go Modimo go aketša, . . .*

“Re ne dilo tše pedi?” Ee. Sa pele, Lentšu la Gagwe le rile O tla e dira. Sa bobedi e bile keno ya Gagwe e ennwego go yona, O tla e dira. Oo, nna!

⁵⁸¹ Ke mohuta ofe wa batho re swanetše go ba? Gobaneng re swanetše go tšewatšewa le go kitima gohle, le go tšeа dilo tša lefase le go dira boka mmotlolo wa go lokologanywa wa 1957 wa Bokriste? Re nyaka go ba mohuta wa fešene ya kgale woo o tšeago Modimo Lentsung la Gagwe, gomme wa bitša dilo tšela di sego gona, o ka re di be di le gona. “Ge Modimo a boletsé bjalo, Seo se a e ruma.”

⁵⁸² Abraham, yo tshepišo e filwego, go yena le Peu ya gagwe, o biditše dilo tšeо di sego gona, o ka re di be di le gona. Ka gore, E be e le tshepišo ya Modimo, go tsebeng gore Modimo a ka se kgone go aketša. O mo tshepišitše seo, gomme o Se dumetše. Gomme ge mengwaga e feta, gomme tshepišo e bonala go ya kgojana kudu, go leihlo la tlhago, E bile kgauswana go Abraham.

⁵⁸³ Sebakeng sa go fokola, le go re, “Gabotse, mohlomongwe ga go ne selo se sebjalo bjalo ka phodišo Kgethwa. Mohlomongwe ke no ya- . . . Mohlomongwe ga go selo se sebjalo. Mohlomongwe ke bile phošo ka go dikelello tša ka tšohle.” Gona, seo se bontšha selo se setee, gore ga se o tswalwe gape. “Gobane go . . .”

⁵⁸⁴ Re kgabotše Lamorena la go feta, feela moragonyana gannyane ka go tema. “Gobane ga go kgonege go motho yoo a kilego a latswa dimpho le dilo tša Legodimong, go wa, gape go impshafatša yenamong go tshokologo.” Ka nnete, ga go kgonagale ka go felela!

*Gobane yoo a tswetšwego ke Modimo ga a gomme a ka
se kgone go dira sebe; gobane pe peu ya Modimo e dula
ka go yena: gomme ga a kgone go dira sebe, . . .*

Peu ya Modimo ke Lentšu la Modimo. “Tumelo e tla ka go kwa, go kwa Lentšu, ‘Sehlabelo se dirilwe. Go fedile.’”

⁵⁸⁵ Bjale, ge o dira phošo, Modimo o tla go dira o e lefele. Eupša ge o dira, o phošo, ga o e dire ka boomo. Tema ya 10, temana ya 47, ke a dumela, “Gobane ge re dira sebe ka boomo morago ga ge re amogetše tsebo ya Therešo.” Eupša morago ga ge o kile wa Tswalwa, o ne Therešo; e sego tsebo ya Yona, eupša o amogetše Therešo gomme E ba kgonthe. Gomme o ngwana wa Modimo, go nako le Bokagosafelego. Modimo o enne gore O tla e dira.

⁵⁸⁶ Jesu o rile, “Yo a kwago Mantšu a Ka, gomme a dumela go Yena yoo a Nthomilego, o ne Bophelo bjo bosafelego, gomme Ke tla mo tsoša mo letšatšing la mafelelo. A ka se tsoge a tla Kahlolong. O fetile lehung go ya Bophelong.” Bjalo ka keno boka yeo, “Modimo a rata gore re swanetše go Bo amogela.”

⁵⁸⁷ Bjale šetšang se a se bolelago fa, Paulo a bolela go ke—ke kereke.

...ga go kgonagale go Modimo go aketša, re swanetše
go ba le khomotšo ye e tiilego, ...

E sego, “Gabotse, ge eba Mabaptist a sa ntshware gabotse, ke tla ya go Mamethodist.” Le a bona?

...re swanetše go ba le khomotšo ye e tiilego, yo a
tšhabetšego go šireletšwa go swarelela go kholofelo e
beilwego pele ga renā:

⁵⁸⁸ Bjale go baleng ga ya mafelelo.

*Kholofelo ye re nago yona bjalo ka sekgwaparetši sa
soulo, ...*

Yona *kholofelo*, keno ye e ennwege ya Modimo, *re ne*
yona bjalo ka sekgwaparetši sa soulo, bobedi kgonthe le
go kgwahla, gomme ye e tsenago ka go yeo e lego ka gare
ga seširo;

⁵⁸⁹ A re boleleng feela nakwana ka “seširo.” Ga se re se hwetše gabotse kudu Lamorena la go feta bošego.

⁵⁹⁰ “Ka go seširo.” Seširo ke nama. Seširo ke se se re šitišago go bona Modimo, sefahlego go sefahlego, ka kerekeng ye. Seširo ke se se re šitišago go boneng Barongwa mo maemong a bona mosong wo, ba eme hleng le ditulo. Seširo ke se se re šitišago go boneng Yena. Re fihlilwe ka morago ga seširo, gomme seširo seo ke nama. Re barwa le barwedi ba Modimo, re ka Bogoneng bja Modimo, “Barongwa ba Modimo ba goragoretše bao ba Mmoifago.” Re ka Bogoneng bja Modimo, nako tšohle. “Nka se tsoge ka le tlogela, ga ešita Nka se le šikologe. Ke tla ba le lena ka mehla, ebile go ya bofelong.” Eupsa seširo ke nama, ke seo se re beago ka ntle ga Bogona bja Gagwe. Eupsa ka soulo, Moya, ka tumelo ya rena re tseba gore O re šeditše. O eme hleng le rena. O fa bjale.

⁵⁹¹ Tlase ka Dothane, mosong wo mongwe, moprofeta wa kgale a dikaneditšwe ke madira gomme mohlanka wa gagwe o ile ntle gomme a re, “Oo tate, naga ka moka e dikaneditšwe ke bašele.”

⁵⁹² Gomme Eliya o emeletše, gomme o rile, “Gobaneng, morwa, go ne ba bantši le rena go feta ba ne bona.”

⁵⁹³ Gabotse, o pantše mahlo a gagwe le go lebelela tikologong. Ga se a kgone go bona selo.

⁵⁹⁴ O rile, “Modimo, ke duma gore O budulle mahlo a gagwe, tloša seširo.” Gomme ge seširo se goramologile go tloga mahlong

a gagwe, go dikologa moprofeta yola wa kgale go be go le dikoloi tša mollo, dithaba di be di ne Mollo ka Barongwa le dikoloi. Ke lena bao.

⁵⁹⁵ Oo, gona Gehasi o kgonne go re, “Ke—ke a kwešiša bjale.” Le a bona, seširo se goramologile. Fao ke moo tšitišo e lego.

⁵⁹⁶ Še yona. E sware go tiiša. Seširo ke se se re šitišago go phela ka tsela ye re swanetšego. Seširo ke se se re šitišago go dira dilo tše o ka kgonthre nyakago go di dira. Gomme Modimo o ile a širetšwa ka nameng, gomme seširo se gagotšwe ka bobedi. Gomme Modimo o bile Modimo gape, gomme O phagamišitše seširo seo A iphihlilego ka go sona Yenamong. Yeo ke tsogo ya Morena Jesu. Go re netefaletša gore, ka go seširo se seo bjale re fihlilwego ka go sona, ka tumelo re a O dumela le go O amogela. Gomme ge seširo se se gagotšwe ka bobedi, ke tla ya ka Bogeneng bja Gagwe ka tiišetšo ye, go tsebeng gore, “Ke Mo tseba mo maatleng a tsogo ya Gagwe.” Mo go Tleng ga Morena Jesu, seširo se se tla phagamišwa gape, ka tsela ye e phethagetšego, go fihla ke tla sepela le go bolela le Yena bjalo ka Mophološi wa ka le Modimo wa ka, ge A tsea terone ya Dafida. Gomme re tla phela neng le neng ka go seširo se ka morago ga ge se phethagaditšwe, eupša seširo se se ne sebe ka go sona. Ga go kgathale ka fao . . . O se tsoge o naganne ka mmele wola wa letago ka lefaseng le. O swanetše go hwa, go swana le soulo ya gago e swanetše go hwa, go tswalwa gape.

⁵⁹⁷ Ka phethagalang, e sego go jeng dinama, le go dira *se*, le go phethagatša mmele, o ka se tsoge wa ba le ona. Gomme o swanetše go tlogela *se*, le go dira *se*, le go dira *se*, le go dira *se*, woo ke molao. Bao ke boramolao. Ga re dumele ka go sebopego sa molao sa phološo. Re E dumela gore re phološitšwe ka mogau. Gomme ga se wena. Lena ga le na le selo go dira le sona. Ke kgetho ya Modimo yeo e e dirago. “Ga go motho a kgonago go tla go Nna ntle le ge Tate wa Ka a mo goga.” Yeo ke nnete. Gomme Yena . . . Tšohle Jesu a tlago go di dira e be e le go tliša ba bao Tate a ba tsebilegopele; gomme a ba kgethetšepele pele ga motheo wa lefase go ba barwa le barwedi ba Modimo. Amene. “Ga se yena yoo a kitimago, goba yena yoo a ratago, eupša Modimo yoo a bontšhago kgaogelo.” Modimo yoo a e dirago. O ka se ikgantšhe, le gatee. Ga go ne selo seo o se dirilego. Modimo, ka mogau, o go phološitše; e sego wena, wenamong. Ge o dira, o ne se sengwe go ikgantšha ka sona. Eupša ga o ne selo go ikgantšha. Dithetho tšohle di ya go Yena. Ke Yena. Gona O go fa kholofelo ya kgonthe, “Ena ka keno, go se kgonagale go bana ba Gagwe go ka tsoge ba lahlega.”

⁵⁹⁸ Bjale, ba hwetša go hwiphinywa bakeng sa go dira phošo. O buna se o se bjetšego. Le hwetša seo. Le se nagane bjale o no ya ntla gomme wa dira sebe, wa phomelela. Ge o dira, gomme o ne mokgwatebelelo woo, go a bontšha ga se nke wa tsoge wa tswalwa gape. Le a e hwetša? Ge o sa ne kganyogo ka go

wena, go dira phošo, gona o sa ne phošo. Le a bona? “Gobane O phethagaditše, go ya go ile, bale bao ba . . . Gomme diphoofolo tšela ka tlase ga Testamente ya Kgale, ka tlase ga matšatši a semolao, di neetšwe ngwaga ka ngwaga, ga se di tsoge tša kgona go tloša sebe.” Eupša ge re bea diatla tša rena go hlogo ya Gagwe, gomme ra ipolela dibe tša rena gomme ra tswalwa gape ka Moya wa Modimo, ga re sa na kganyogo ya sebe. Sebe se fetile go tloga go wena. Yeo ke bakeng sa nako le Bokagosafelelego.

⁵⁹⁹ O tla dira diphošo. O tla wa. O tla dira diphošo ka boomo. O tla tšwa nako ye nngwe gomme wa dira dilo. Seo ga se re gore o lahlegile. Seo se ra gore o ya go hwetša phošollo.

⁶⁰⁰ Mošemane wa ka yo monnyane, makga a mantši, bana ba ka, ba dira dilo. Ba gago ba a dira le bona. Gore wena . . . Ba a tseba seo se kgahlanong le melao ya gago—ya gago. Gomme ba tseba ba letela eng ge ba e dira. Ba ya go hwetša go hwiphinywa bakeng sa yona, ka dinako tše dingwe ye botse. Eupša e sa le ngwana wa gago. Ka nnete.

⁶⁰¹ Ga go kgonege go motho yoo go tsoge a ile gape, yoo a kilego a ke a tswalwa ke Bophelo bjo Bosafelelego. Modimo ga se mofi wa Moindia. “Yoo a kwago Mantšu a Ka, gomme a dumela go Yena yoo a Nthomilego, o ne Bophelo bjo bosafelelego; gomme a ka se tsoge a tla Kahlolong, eupša o fetile lehung go ya Bophelong. Ke tla mo tsoša mo matšatšing a mafelelo.” Yeo ke tshepišo ya Modimo.

⁶⁰² Bjale ge le ka ya pele, la re, “Oo, gabotse, gona nka no dira . . .” Ka mehla ke dira se ke nyakago go se dira. Eupša ge eba o Mokriste, ga o nyake go dira selo sa phošo, gobane bjona Bophelo ka go wena, ona motheo. Ge o nyaka go dira phošo, go a bontšha selo sa phošo se ka *fa*. “Meetse a go galaka le a mabose a kgona bjang go tšwa mothopong wa go swana?”

⁶⁰³ Kafao le bile go hlakahlakana go mohuta tsoko wa maikutlo, goba *sengwe se sengwe* maikutlo a nonwane, Se lebale! Eya morago aletareng gomme o re, “Morena, tloša bophelo bja ka bja kgale bja sebe, gomme mpee ka go leemo le lebjalo gore tlhologelo ya ka ka moka . . .”

“Yo a tswetšwego ke Modimo ga a dire sebe.” Yeo ke nnete. Ga a ne kganyogo go dira bjalo.

⁶⁰⁴ Ka kgonthe, diabolo o tla mo thea *fa le fale*, eupša e sego ka boomo. Beibele e boletše bjalo. Diabolo o tla mo thea, bjale le go ya. Nnete, o tla dira. O lekile go bea mereo go Morena wa rena Jesu. O dirile go Moshe, gomme a mo tantše. O dirile go Petro, gomme o mo tantše. O dirile go ba bantši, eupša . . . Petro o Mo latotše, eupša morago o sepetše gomme o llile gabohloko. Go be go na le Se sengwe ka go yena.

⁶⁰⁵ Ge leeba le lelokotšwe go tšwa arekeng . . . Legokubu le ile ntle, le kekereditše gohle. Le be le ka arekeng gabotse, eupša ge le ile ntle, tlhago ya lona e be e fapano. Le kgonne go

ja ditoto tšohle tša kgale tša go hwa le nyakilego, gomme la kgotsofala. Gobaneng? Le be le le legokubu, le go thoma. Le be le le setopeledi. Le be le se la loka. Le be le le moikaketši yo a dutšego ka sehlageng le leeba, feela bogolo boka leeba le bile. Le kgonne go fofela e ka ba kae leeba le ka fofelago. Eupša le kgonne go ja dijo tše botse feela boka leeba le ej. Gomme morago le kgonne go ja dijo tša go bola, se leeba le sa kgonego go se ja. Gobane, leeba ke mmopo wa go fapania. Ke lona lebopo la go fapania. Ke lona leeba. Gomme leeba ga le kgone go šila dijo tša go bola, gobane ga le na sabohloko.

⁶⁰⁶ Gomme motho yoo a tswetšwego ke Moya wa Modimo o ba leeba la Modimo, tlhago ya gagwe, phetogo ya gagwe, tlhamego ya gagwe. Ee, mohlomphegi. O bea moya wa le—wa leeba ka go legokubu, le ka se tsoge la dula go setoto sa go hwa. Ge a ka tsorama fase ka phošo, ka nnene o tla tloga ka pela. A ka se kgone go e emela. Gomme motho yoo a tswetšwego ke Moya wa Modimo, ga a tswakatswake. A ka tsorama ka sepotsong nako ye nngwe, eupša o tla tšwa ka fale ka pela. Mosadi a ka mo goketša, a mo dira a hlanolwe, eupša o tla retolla hlogo ya gagwe gape. O tla tloga fale ka pela. Gobaneng? Ke yena leeba. Yeo ke nnene. Ga o ye go mo tlaetša, gobane seo o a se tseba. “Dinku tša Ka di tseba Segalontšu sa Ka, gomme o šele di ka se mo latele.” Ke yena leeba, le go thoma. Seseo se ke bolelago ka sona, sa kgonthe se sengwe seo se kgwaparetšago ka fale.

⁶⁰⁷ Šetšang sekgauswi bjale. “Modimo o enne.” Oo, e . . .

Kholofelo ye re nago yona bjalo ka sekgaparetši sa soulo, bobedi . . . go tia, le ye e tsenago ka go—ka go sela se e lego seširo;

⁶⁰⁸ “Seširo.” Modimo o theogile, a širetšwa ka nameng. Go dira eng? Go ipontšha Yenamong. O ile a swanelo go iphihla, gobane re be re sa kgone go Mmona. Gomme O iphihlile ka morago ga seširo. Gomme seširo e be e le Mang? Jesu. “Ga se Nna yoo a dirago mediro, Tate wa Ka,” go boletše Jesu. “Tate wa Ka o dutše ka go Nna. Ke a šoma. Tate o a šoma, gomme Ke a šoma fao.” Yena šo bjalo ka Moširetšwa, a sepela nameng, Modimo, Imanuele, Modimo le rena. “Modimo o be a le ka go Kriste, a boelanya lefase go Yenamong.” Yena šo, a sepela gohle.

⁶⁰⁹ Bjale, O fologetše tlase gomme o dirile tlhwekišo, goba monyetla, goba seloba, gore ka lehu la Gagwe o neetše, o lefile poreisi ya sebe, gore A ke a tle morago le go dula ka go rena. Gona tumelo yeo re nago le yona ke—ke tumelo ye e šireditšwego, goba motho wa seširo. Kagona ga re lebelele go dilo tše re di bonago ka go seširo se. Seširo se ne dithuto, gomme se dira dilo le go bolela dilo. Ke selo sa sesaense. Eupša Moya wa Modimo yo a phelago woo o phelago ka fa, o bitša dilo tšela di sego gona, o ka re di be di le gona, ge Modimo a boletše bjalo. Seseo seširo sa gago. Re ka go seširo.

⁶¹⁰ Bjale, letšatši le lengwe O tla phagamišetša seširo godimo, se sa tswalwago ke mosadi ka tlhogelo ya thobalano ya monna le mosadi, eupša ka thato ya Modimo O tla bolela gomme o tla tšwelela. [Ngwanešu Branham o thwantšitše monwana wa gagwe—Mor.] Gona re tla ba le mmele boka mmele wa Gagwe Mong wa letago. Re tla širetšwa, gore re kgone go boledišana seng, ra šikinyana diatla seng.

⁶¹¹ Bjale, ge re tloga fa, go ne tabarenakele, theophany, feela seswantšho sa motho, seo se sa jego, se sa nwego, se sa robalego, se phafogile neng le neng. Fao ke moo re yago. Eupša ba letile ka tlase ga Aletara, ba goeletša, “Morena, botelele gakaakang? Botelele gakaakang?” go tla morago tlase. Gobane, ba nyaka go šikinyana diatla seng sa bona. Ba nyaka go dula fase le go ja, le go boledišana seng sa bona. Ke batho. A go šegofatšwe Leina la Morena!

⁶¹² Mola Modimo a dirile motho ka seswantšho sa Gagwe Mong kua mathomong, O mo dirile bjalo. O kopanetše le bona seng, gobane re a tsebana seng. Re rata dilo tše Modimo a re dirilego, gobane re dirilwe bjalo. Ka go Tleng go gogolo ga Gagwe, bale ba lego komana ba tla ba bjalo neng le neng. Gosehwe, re tla ema ka go swaneng ga Gagwe. Oo a go šegofatšwe Leina la Kriste!

⁶¹³ Gomme bjale re ne tiišetšo ya phološo ya rena, bjalo ka ge re Mo amogela bjalo ka Mophološi wa rena wa sebele, bjalo ka Mofodiši wa rena. Tšohle tše ke diputseletšo, goba, lešokotšo leo le lefelelwago go pholisi ya inšorense. Amene. Le tseba se pholisi ya inšorense e lego. O ka kgona go hwetša lešokotšo go yona go fihla boleng bo etla. Ka mnene. O ka hwetša lešokotso. Gomme re hwetša lešokotšo bjale. Feela, selo, ka pela ge re hwetša lešokotšo, putseletšo e agelwa godimo gape.

⁶¹⁴ Modiredi wa inšorense, nako ye nngwe, o rile go nna, “Billy, ke tla rata go go rekišetša inšorense tsoko.”

Ke rile, “Ke ne ye nngwe.” Mosadimogatša wa ka o lebeletše go ntikologa.

⁶¹⁵ Bjale, ga go selo kgahlanong le inšorense. Eupša batho ba bangwe ba “diila inšorense.” Kafao, ba retologile. O rile . . .

⁶¹⁶ Mosadimogatša wa ka o lebeletše go ntikologa, go se tlwaelege, “O ne inšorense?”

⁶¹⁷ Ke rile, “Kgonthe.” Ga se a tsebe selo ka yona.

⁶¹⁸ O rile, “Gabotse, Billy, ke mohuta mang wa inšorense o nago nayo?”

⁶¹⁹ Ke rile:

Tiišetšo ye e šegofetšego, Jesu ke wa ka!

Oo, a tatsopele ya letago le Lekgethwa!

Mojabohwa wa phološo, morekwa wa Modimo,

Motswalwa ke Moya wa Gagwe, mohlatswiwa
ka Mading a Gagwe.

⁶²⁰ O rile, “Yeo e lokile kudu, Billy,” o rile, “eupša e ka se go iše godimo fa ka dirapeng.”

⁶²¹ Ke rile, “Eupša E tla ntšhetša ntle. Yeo ke kgwekgwe ya selo.” Ga ke tshwenyege ka ga go ya fale; ke tshwenyega ka ga go tšweng.

⁶²² Gomme ge e sa le ke ne tiišetšo, ka Modimo wa keno wa Bokagosoafelego, gore O tla ntsoša gape ka go swaneng ga Morwa wa Gagwe, mo letšatšing la mafelelo, ke tla sepela ka sebete le go ba le khomotšo le sekgwaparetši sa soulo, gore, ge ke sa le ka go seširo se go ne Sengwe tsoko sa go se bone se nkgwarapeditšego go Leswika la mehleng mošola. Ge meetse a taboga le go thunya, ga go dire phapano e ka ba efe. Ge lehu, mehlako, goba e ka ba eng, e sa re aroganye go tloga go lerato la Modimo. Sekgwaparetši sa ka se swere ka gare ga seširo. Anke mafula a tsoge. Anke a thulanye. Anke baganamodimo ba tle. Modumedi motswalwagape o ne sekgwaparetši. O ka se kgone go bona go kgabola seširo se golebjalo. Eupša ke a tseba sekgwaparetši sa ka se swara mošola go Leswika la mehleng, Yo a lego tshepišo ye e ennwego gore O tla ntsoša mo letšatšing la mafelelo.

⁶²³ Ga go makatše o ka lebelela lehu ka sefahlegong, gomme wa re, “Lebola la gago le kae? Lebitla, phenyo ya gago e kae? Eupša a go lebogwe Modimo Yo a re fago phenyo ka Morena wa rena Jesu Kriste.”

Ka go yona *pulamadibogo...*

Oo, nna! Ga re ye go tla go thuto.

Moo pulamadibogo...bakeng sa rena

⁶²⁴ Pulamadibogo. A le kile la ke la lemoga, ka matšatšing a kgale a bodikela (Makga a mantši ke ile go kgabola mehlala ya kgale.), pulamadibogo, goba mokgolatsela? Ge terene ya koloyana e be e senyega, bakeng sa meetse, mokgolatsela o kitimetše pele. Gomme o bone meloko ya Maindia; o ba fetile. Gomme o bone moo go bego go ne mothopo wa meetse. O potlaketše morago go botša molaodi wa terene ya koloyana, “Akgofisa dipere, yo mongwe le yo mongwe a be le sebete gabotse, gobane feela ka kua ga thaba go ne mothopo o mogolo wa meetse.” Ke pulamadibogo.

⁶²⁵ Gomme fa, Pulamadibogo. Motho o kile a pinyelešwa fase ke diabolo, ka tlase ga mollo wa ka pela, eupša Yo mongwe o tšere sehlaga sa matšenekane. Yoo e bile Jesu. Pulamadibogo e ile pele ga rena. Gomme Sathane a eme fale ka matšenekane, a re pinyeliditše fase, ka mehla bokgobeng le go tšhaba lehu. O be a hlapeditše Mothopo wola. Ka kgonthe, o be a le. O filwe thomo, gobane re be re dirile sebe gomme re gapilwe go tloga go Ona. Eupša Pulamadibogo, Kriste, a tsena gomme o tšere sehlaga.

⁶²⁶ Le kwele pina yela ya kgale, “Swara sebo, gobane ke etla?” Swara sebo, ga go selo; a re se tšeeng. Ga re sa nyaka go se swara. Kriste o tšere sebo. Haleluya! Lemati le butšwe. “Go ne Mothopo o butšwe ka ntlong ya Dafida, ka go toropokgolo ya Dafida, bakeng sa go hlwekiša, bakeng sa tlhwekišo ya baditšila.” Mothopo wa rena o šetše o tsene bakeng sa rena.

⁶²⁷ Pulamadibogo, O a re botša, “Go ne lefelo feela mošola, mošole, moo le ka se tsogego la tšofala.” Moo go ka se bego le mašošo, moo o ka se swanelego go šomiša tša Max Factor go go dira o bogege gabotse go monnamogatša wa gago. Pulamadibogo e ile pele. Ga go tsoge gwa ba le lefelo moo o tšofalago le go lapa le go roromela. Go ne lefelo moo o ka se tsogego wa lwala. Moo lesea le ka se tsogego la ba le sehuba. Moo o ka se tsogego wa tomola la maaka, goba, leino, go ba le la maaka. Haleluya! Oo a go šegofatšwe Leina la Gagwe! O tsene, gomme re tla ema gosehwe ka go swaneng ga Gagwe, letšatsitsoko mošola. Dinaledi le letšatši ba tla phadima go di feta. Ka nnete. Pulamadibogo o ile pele ga rena.

... *pulamadibogo o ile, o tsene bakeng sa rena, ebile Jesu, a dirilwe moprista yo mogolo neng le neng ka tshepedišo ya Melekitsedeke.*

⁶²⁸ Pulamadibogo yo mogolo yo o ile pele ga rena, go kgora tsela. O bile go tšwa go Moya, methopo ye megolo ya molalatladi wa Modimo, Yo a sa bago le mathomo goba bofelo. O be a le, neng le neng, Modimo.

Mahlasedi a a Seetša a ile pele. E be e le mahlasedi a lerato, leo ke lonalona, khubedu. Mmala wa go latela o a latela, e lego bolou; bolou, boreresi. Ya go latela, go lateleng morago ga woo e bile mebala ye mengwe, ka mebala ye šupago ya go phethagala, e lego Meboya ye šupago ya Modimo, yeo e ilego pele go tšwa go Mothopo wola wo mogolo goba Taamane yela ye kgolo yeo Jesu a boletšego ka yona. Taamane yela ye kgolo e kgetlotšwe, go bonagatša mebala ye. Modimo o dirilwe nama le go dula magareng ga rena, gore A ke a bonagatše botho bja Gagwe le kgaogelo magareng ga rena, ka dimpho le maswao le matete.

Molalatladi wola ka moka wo mogolo o ile wa swanelo go ba ka go theophany, ya go dirwa ka seswantšho boka motho. Golebjale, O be a se motho; ga se A be le nama, golebjalo. O be a le theophany.

⁶²⁹ Moshe o rile, “Ke tla rata go Go bona.” Modimo o mo fihlile ka leswikeng.

⁶³⁰ Gomme ge A fetile, O retolotše mokokotlo wa Gagwe. Moshe o rile, “O bonagatše boka mokokotlo wa motho.”

⁶³¹ Gona ke eng e diregilego? Letšatši le lengwe tlase fale, ge Abraham a be a dutše ka tenteng ya gagwe. Re tla tla go yona, bošegong bjo. Ge Abraham a be a dutše ka tenteng ya gagwe, Modimo o rotogetše go yena, ka mmeleng wa nama.

“Oo,” o re, “Ngwanešu Branham, o be a . . .”

⁶³² Re tla Mo hwetša thwi fa a kopana le Abraham pele ga fao, ka tshepedišong ya Melekitsedeke, mmele wa nama, e lego Modimo. Kgonthé, e be e le. E be e le Modimo nameng.

⁶³³ O re, “Gona, Ngwanešu Branham, gobaneng A ka swanela go tla morago le go tswalwa?”

⁶³⁴ O be a se a belegwa nako yeo. O be a nno hlolwa, mmele woo A dutšego ka go ona. Melekitsedeke e be e le Kgoši ya Salema, e lego Kgoši ya Jerusalema, e lego Kgoši ya khutšo; yo ešitago a sa bago le tate goba mme, mathomo a matšatši goba bofelo bja bophelo.

Jesu o bile le bobedi tate le mme, le mathomo a matšatši le bofelo bja bophelo. Eupša O be a dirilwe “ka tshepetšo” ya Melekitsedeke, a se nago mathomo a matšatši goba bofelo bja bophelo.

⁶³⁵ Melekitsedeke e be e le Modimo Yenamong. Melekitsedeke o be a le Jehofa Modimo, Yena wa go swana yoo a kopanego le Abraham, mengwaga moragorago, ka pele ga tente ya gagwe. O bile le mokokotlo wa Gagwe o mo furaletše; O rile, “Gobaneng Sarah a sega?” Yeo ke nnete. O be a le Yena yo a emego fale, a lebeletše kua go lebanya Sodoma. Abraham o Mo lemogile, gobane ka gare ga seširo sa gagwe go be go le sethekgo se swere tshepišo yela. E sego gobane o bile le maikutlo tsoko, eupša Modimo o mo diretše tshepišo. Gomme ge a etla go kgomagana le makenete wola wo mogolo, o tsebile O be o le ka nameng yela.

⁶³⁶ Sepeletše ntle le Abraham, ntle fale sekgala se sennyane. O boditše Abraham. O rile, “Go boneng seo, Ke tla boloka dilo tše go Abraham, go bona gore ke yena mojabohwa wa lefase? Ke no se tle go e dira.” Kafao, “Abraham, Ke tla go botša se Ke lego tseleng ya Ka go se dira,” re a e swara bosegong bjo, “tlase fale ka Sodoma,” le se bohole ba bego ba eya go se dira. Gomme ka pela ge A šegofaditše Abraham, O ile morago sebakabakeng gape. Monna yo a emego fale gomme a bile le lerole diaparong tša Gagwe, Monna. Gomme e sego seo feela, eupša O ja nama ya namane yeo Abraham a e bolailego, le go nwa maswi go tšwa kgomong, le go ja dinkgwa tše rilego (borotho tsoko bja lehea), gomme o bile le potoro go bjona. Yeo ke nnete tlwa. Gomme morago a fetogela morago go theophany gape.

⁶³⁷ E be e le eng? Gobaneng A se a o tšeа nako yela? Ga se A ke a tswalwa boka wena le nna. Eupša O be a swanetše go ba nama, gore A kgone go swara lebola lela. Wola e be e le mmele wa go hlolwa. Wola e be e le mmele woo A nnogo goga khalesiamo le potaše go tšwa lefaseng, gomme o rile, “Fše,” gomme a tepogela ka go ona. Sela e be e le selo sa go swana Melekitsedeke a bilego. O tsene ka go yena, ka mmeleng woo A kgonnego go sepela pele ga gagwe ka tlase ga seširo, sa seširo sa tlholo ya Gagwe Mong; e sego seširo sa tlholo ya mosadi, ka popelo ya mosadi, ka se—se

sele, ga se nke. Eupša O hlotše wo gomme a tepogela ntle ka go ona, gomme o boletše, ka tshepedišo ya Melekitsedeke.

⁶³⁸ Melekitsedeke yo ke Mang?

Ka gore Melekitsedeke yo, kgoši ya Salema, (e lego Jerusalema), mokgoma wa Modimo yogodimodimo, (ka nnete), yo a kopanego le Abraham a bowa go bolaeng ga dikgoši, gomme o mo šegofaditše;

Go yena gape Abraham o fa karolo ya lesome ya tšohle; sa pele ka tlhathollo Kgoši ya toko, (lerato lela le legolo, Moya wola wo mogola kua mathomong) . . . Kgoši ya toko, . . . ka morago seo . . . Kgoši ya Salema, e lego, kgo Kgoši ya khutšo;

Ntle le tate, ntle le mme, ntle le setlogo, a se ne mathomo a matšatši, goba go fela ga bophelo; . . .

⁶³⁹ E be e le mang? Ga sa nke A ke a tswalwa, A ka se tsoge a hwa. Ke mang? E be e le Modimo, kgonthé, e be e le, ka morithipele wa Jesu Kriste. Ka nnete o be a le. Eupša O be a swanetše go tla ka mosadi, ka tsela ye o tlago ka mosadi. Gomme O ile a swanelo go tla ka tsela ye o tlago, gore a go tliše morago go Yena. Haleluya!

Mogau wa go makatša, segalo se sebose bjang,
Woo o phološitšego wa go šokiša, sefov sa
leratha boka nna!

Nkile ka lahlega, eupša bjale ke hweditšwe, ka
mogau wa Gagwe,
ke be ke foufetše, eupša bjale ke a bona.

⁶⁴⁰ Ke kwešiša se A bego a swanetše go se dira. Modimo o bile nna, gore nna ka mogau nke ke be Yena. O tšere dibe tša ka, gore ka toko ya Gagwe nke ke be le Bophelo bjo Bosafelego. Ga se ka kgona go ikgetha nnamong. Tlhago ya ka e be e le modiradibe. Ga se ke be le selo go dira le yona. Ke “tswetšwe wa lefase, ka bopelwa bokgopong, ka tla lefaseng ke bolela maaka.” Ebile go se sekgoba, le gannyane; go se selo, ebile go se kganyogo.

⁶⁴¹ Botša kolobe e “phošo, go ja dikošo,” a o ka? Bona bontši kudu e tla go theetšago. Botša legokubu le “phošo, go ja ditoto tša go hwa,” gomme o bone se a tla go botšago. Ge a ka bolela, “Šetša taba tša gago.” Ka nnete.

⁶⁴² Oo, eupša mogau wa Modimo woo o fetotšego tlhago ye, le go mpha sebaka go kganyoga le go hlologela le go nyorelwá, “Botho bja lerato la gago bo kaone go phala bophelo, O Modimo. Pelo ya ka e tla hlologelwa Wena.”

⁶⁴³ Dafida o rile, “Boka tshepe e nyoretšwe dinokana tša meetse, go bjalo soulo ya ka e nyoretšwe Wena, O Modimo.”

⁶⁴⁴ Modimo o file motho lenyora lela, go rapela Yena, go rata, go Mo nyaka. Eupša motho o le fapoša ka pitšo ya diabolo, gomme o ya le go kganyoga basadi le maipshino le dilo tša lefase, a leka go kgotsofatša tlholo yela ye kgethwa yeo Modimo a e

beilego ka gare, go rata Yena. O e bea godimo ga dilo tša lefase. Eupša, ngwanešu, ge a kile a fetolwa, gomme mothopo wola ka dikolopisane ka go ona, mehuta yohle ya—ya ditlhakatlhakano tša sedibaikepelwa, e hlwekišitšwe le go thibela ditwatši, gomme Meetse a go seka a Modimo a beilwe ka fale, sebe se ka se tsoge se a kgwathile. Amene.

O ke Mo rata bjang! Ke Mo hlompha bjang!
Bophelo bja ka, phadimo ya letšatši ya ka, tša
ka ka moka go ka moka!

Mohlodi mogolo o bile Mophološi wa ka,
Gomme ka moka botlalo bja Modimo bo dula
ka go Yena.

Go theoga go tšwa letagong la Gagwe,
kanegelo ya go dula e phela,
Modimo wa ka le Mophološi wa ka o tlie,
gomme Leina la Gagwe ke Jesu.

O tswaletšwe legopong, yo šele go ba Gagwe
mong,
Modimo wa manyami, dikeledi tša mahloko.

O ke Mo rata bjang! Ke Mo hlompha bjang!
Mohemo wa ka, phadimo ya letšatši ya ka, tša
ka ka moka go ka moka!

⁶⁴⁵ O Modimo! O kgonne bjang go e dira? Motho o lekile go e ngwala. Yo mongwe o rile:

Ge re ka tlatša lewatlekgolo ka enke,
Gomme lehlaka le lengwe le le lengwe lefaseng
pene;
Mafaufau ohle a dirilwe ka pampiri,
Gomme monna mang le mang mongwadi ka
kgwebo,
Go ngwala lerato la Modimo godimo.

Ka fao Modimo yo mogolo wa Legodimong a bilego nama le
go tšeа dibe tša ka!

Go ngwala lerato la Modimo godimo
Le ka gwapiša lewatlekgolo go omelela;
Goba sekorolo se ka swara lohle,
Le ge se taramolotšwe go tloga leratadimeng
go ya leratadimeng.

⁶⁴⁶ Gomme go dira bajabohwa ba phološo ye kholofelo ya kgonthe, O enne ka Yenamong gore O tla re tsoša mo matšatšing a mafelelo, a re fa Bophelo bjo Bosafelego. “Gomme ga go motho a ka go ba utla seatleng sa Ka.” Amene.

A re rapeleng.

⁶⁴⁷ A o molato go hlokologeng lerato la Gagwe? A o tshedišitše mahlo Boyena bja Gagwe bja go šegofala, Yena yo mogolo yo yo a go dirilego se o lego? Gomme bjale ke wena yo,

mosong wo, bokgole bjo ka bophelong, gomme e go fa monyetla. A o nyaka go tšwelapele go phela? Go ne tsela e nnoši go phela, yeo ke go dumela go Morena Jesu. Ge eba wena, go tšwa pelong ya gago, o dumela gore Yena ke Morwa wa Modimo gomme wa Mo amogela bjalo ka Mophološi wa gago, le go dumela gore Modimo o Mo tsošitše bakeng sa tokafatšo ya gago, ge eba o nyaka go e amogela motheong woo, ke ya gago bjale.

⁶⁴⁸ A o ka phagamiša seatla sa gago? Soulo ye nngwe ya go se sokologe, yeo e ka ratago go sokologa mosong wo, e re, "Nkgopole, ngwanešu, moreri, ge re sa ya go rapela. Le nna ke paletšwe. Ke tšoenne kereke, eupša ke—ke a tseba ga—ga se nke ka ke ka ba le sela se o bolelago ka sona. Ga se nke ka tswalwa ka Moya wola, Ngwanešu Branham. Ke no—ke no se be le Ona, ke sohle. Ke nyaka o nthapediše, gore Modimo o tla O fa go nna mosong wo." Modimo a go šegofatše, mohlomphegi. A go ka ba le yo mongwe? A re, "Modimo, ntire se O nyakago ke eba sona. Ke nyaka Wena go ba... ke nyaka go ba boka O nyaka ke be. Ke ganne lerato la Gago." Modimo a go šegofatše, morwa.

⁶⁴⁹ Feela nakwana bjale.

Ge re ka tlatša lewatlekgolo ka enke,
 Gomme lefaufau le dirilwe ka pampiri;
 Lehlaka le lengwe le le lengwe lefaseng pene,
 Gomme monna mang le mang mongwadi ka
 kgwebo;
 Go ngwala lerato la Modimo godimo
 Le ka gwapiša lewatlekgolo go omelela;
 Goba sekorolo se ka swara lohle,
 Le ge se taramolotšwe go tloga leratadimeng
 go ya leratadimeng.
 Oo, lerato la Modimo, le humile le go hlweka
 bjang!
 Ka fao le hlokago magomo le go tia!
 Le tla ema go ya go ile,
 Pina ya bakgethwa le Barongwa.

⁶⁵⁰ Morategi Modimo, ka therešo moreti yoo a ngwadilego mantšu ale a be a no ba boka a mangwe a mantši a badumedi ba Gago, go puruputša, go leka go hwetša mantšu go e hlagiša. Gomme go ngwadilwe ka Beibeleng, "Bontši, gobane moreri o be a le bohlale, o nyakile le go beakanya ka lenaneo mantšu a mantši." Oo, ka fao re ka ratago go ba le maleme le tlolontšu yeo re ka kgonago go hlaloša go batho se ka kgonthe e lego, eupša ga go hwetšagale go dipounama tša bagohwa. Bokagosafelego bjhohle, ntle le pelaelo ge eba e ka tsoge ya e utolla, kafao gore Modimo wa Legodimo a ka tsoge a tla lefaseng go phološa ba go šokiša, balahlegi, badiradibe ba maratha.

⁶⁵¹ Ke a Go rapela, Tate, gore ka mantšu a se makae a go se robege a, goba mantšu a go robega mosong wo, boka nkabe

ke boletše, gore yo mongwe o hweditše khutšo le kgotsofalo le khomotšo ye maatla, yo a šhabetšego bakeng sa tšhireletšo. Gomme anke soulo ya bona e kgwaparetše go tshepišo yela ye Modimo a e enetšego, gore O tla ba tsoša letšatšing la mafelelo. Boati bja diatla bo ile godimo, ka moagong, thwi fa ka go tabarenekele ye. Modimo, ba fe kholofelo yela e tiilego, gonabjale. Anke ba kgwaparetše go Leswika la mehleng. Ga go kgathale gore lewatle le ka tšubutla gampe gakaakang gomme magatlapi a mannyane a ona a ka taboga, ba ne sekgwaparetši, tshepišo ya Modimo. Fale ba a dula, “Modimo o E boletše. A ka se aketše.”

⁶⁵² “Yoo a kwago Mantšu a Ka,” a ke lekilego go a rera mosong wo, “gomme a dumela go Yena yoo a Nthomilego, Jehofa, o ne Bophelo bjo bosafelego; gomme a ka se tle kahlolong, eupša o fetile lehung go ya Bophelong.”

⁶⁵³ O Wena wa Gosafelego, šegofatša bale lehono. Gomme anke motho yo mongwe le yo mongwe a lego ka fa yoo a sego ka tlase ga Madi, soulo ya bona e sa nkago ya ke ya sokologa, anke e direge feela bjale, Morena. O ſoma sephiri. Yohle ke ya Gago. E gafetšwe go Wena. Ke a rapela gore O tla bo fa go bona, Bophelo bjo Bosafelego. Anke, letšatšitsoko, godimo ka lešing le lengwe, bjalo ka o tee ka o tee re theoga go kgabola moedi, anke re kopane godimo fale moo ba ka se tsogego ba rile “ſalang gabotse” gape.

Letšatšitsoko re tla tla nokeng mo go
tswaleleng ga nako,
Ge dikgopololo tša mafelelo tša manyami di ile;
Go tla ba yo mongwe a ntetile yoo a tla
mpontšhago tsela,
Ga ke a swanela go tshela Jorodane ke nnoši.
Go tla ba yo Mongwe, yo mongwe a ntetile yoo
a tla mpontšhago tsela,
Ga ke a swanela go tshela Jorodane . . .

⁶⁵⁴ Bohle bao ba nago le kholofelo yeo, phagamiša seatla sa gago bjale ge o phagamiša hlogo ya gago.

Ga ke a swanela . . .

Bjale nno Mo tumišang. Molaetša o fedile. A ga la thaba? Modimo o enne O tla . . . Modimo o enne O tla kopana le wena fale.

Jesu o hwetše dibe tša ka go lefa;
Ge ke bona leswiswi . . .

O reng? Lebola le ile.

O tla be a ntetetše,
Ga ke a swanela go tshela Jorodane ke nnoši.
Dinako ke hlokomologilwe, le go lapa . . .

Nno Mo tumišang bjale.

Go bonala e ke bagwera ba ka bohle ba ile;
A o kile wa betha lefelo leo?

Eupša go ne kgopolo e tee yeo e ntutuetšago.
Tshepišo e be e le eng?

Dira pelo ya ka e thakgale,
Ga ke a swanela go tshela Jorodane . . .

⁶⁵⁵ Bjale, bana ba tshepišo, nno Mo tumišang bakeng sa go e dira.

Ga ke a swanela go tshela Jorodane ke nnoši,
Jesu o hwetše dibe tšohle tša ka go lefa;

Go direga eng bjale?

Ge ke bona leswiswi, O tla be a ntetetše,
Ga ke a swanela go tshela Jorodane ke nnoši.

“Ge ke etla nokeng . . .” Yo mongwe le yo mongwe wa lena o a tla. Go ne wo mogolo, moriti wo moso o eme fao pele ga gago. Ke lemati le legolo. O ya go tsena ka fale, le lengwe la matšatši a, mohlomongwe pele letšatši le fela, mohlomongwe pele kereke e tswalela mosong wo. O ya ka fale. Nako ye nngwe le ye nngwe pelo yela e rethetha, o kgato e tee kgauswana.

Eupša ge ke bona leswiswi, O tlabe a letile fale,
O rile O tla. O enne O tla.

Gona ga ke a swanela go tshela Jorodane ke nnoši.

⁶⁵⁶ O Morena wa go Šegofala, dipelo tša rena di tletše, mosong wo, wa go falala.

⁶⁵⁷ Go nagana ka ge morethetho o emiša, gomme mooki a gatelela mosamelo go dikologa hlogo ya gago. Gomme diatla tša gago, ga o sa kgona go šikinyega. Diatla tša gago di fetogile aese. Bana ba gago, mme wa gago, baratiwa ba gago ba a goeletša le go lla. Lemati lela le legolo le a bulaga, mošola. O tla be a letile.

⁶⁵⁸ Dafida o rile, “Ge nka dira bolao bja ka ka heleng, O tla fa fale.” Ga ke a swanela go e tshela ke nnoši. Ge mefafatšo ya noka e thoma go phadima sefahlegong sa rena, Modimo o tla tšea sekepebophelo, a re hlahlal thwi go e tshela. O tshepišitše O tla. Dafida moprofeta o rile, “Ya, le ge nka sepela molapong wa moriti wa lehu, nka se boife bobe. Wena o na le nna. Molamo wa Gago le lepara la Gago, di a nkhomotša.”

⁶⁵⁹ Morena, re thabile kudu lehono, gore re akareditšwe mojabohwa wa tshepišo. Lehono re ne Bophelo bjo Bosafelego ka teng ga rena, gobane re rata Morena Jesu gomme re Mo dumetše, gomme re amogetše Lentšu la Gagwe le thuto ya Gagwe. Gomme O re fa, setswalelo sa tumelo ya rena, Moya wo Mokgethwa, setswalelo sa Moya wo Mokgethwa. Tumelo ya rena ka teng ga rena e kgwapareditše. Gomme le ge makga a mantši re sepela

go kgabola meriti ye meso, makga a mantši re a thekesela mo tseleng, eupša sekgwaparetši sa rena se sa swere. Go ne se sengwe ka go sona, kgole mošola, seo se bonalago go be se re hlahla, se re, “Eyang pele. Re ya pele.”

⁶⁶⁰ Modimo, re šegofatše. Re a Go hloka. Re boloke ka mehla go tshepega le go rereša go fihlela nako ye O tlago bakeng sa rena, re tla Go tumiša go kgabola mabaka a sa kgaotšego. Gomme letšatši leo ge re ema mo lefaseng... Maoto a Gagwe a go šegofala ga sa nke a ke a kgwatha lefase golebjale. Yena Šole o eme fale, ka sebakabakeng; le bakgethwa le balopollwa go tšwa mabakeng ohle, go kgabola tišo ye nngwe le ye nngwe, ya pele, ya bobedi, ya boraro, ya bone, ya bohlano, ya boselela, le ya bošupa, bohole ba eme fale ba apere toko ya Gagwe; re Mo hlomamiša Kgoši ya magoši le Morena wa marena, le go opela dikanego tšela tša topollo. Dipelo tša rena tša go fokola di tla roromela ge re lebelela go Yena Yo a re ratilego le go ineela Yenamong bakeng sa rena. Mola re be re sa ratege le badiradibe, Kriste o hwile gore re ke re phološwe. Re a Go leboga bakeng sa yona, Tate, Leineng la Kriste. Amene.

⁶⁶¹ Le a Mo rata? Oo, O kgonthe bjang. A ga le ikwele feela boka le ka no rata go no bea matsogo a lena go Mo dikologa ka mokgwa wo mongwe? A le ka se no rata go abula le go kgwatha maoto a Gagwe, le a tseba?

⁶⁶² Le a tseba, go be go fela go ne batho tsoko ba etla go tirelo ya ka ka Phoenix, Arizona, ba re, “Ke tla rata go e boledišana le Yena. Ke tla rata go re, ‘Morena, O nthatile mola tsela ya ka e be e eba go fifala kudu.’” Ke no rata go e boledišana le Yena pele re tshelela mošola. Ke—ke nyaka go Mmona. Ke—ke—ke no nyaka go Mmona. Go nagana ka fao nka ikwelago, ka fao pelo ya ka ya go šokiša e tla roromelago ge ke Mmona a eme fale.

⁶⁶³ Ke be ke fela ke makala, “Ke duma nkabe ke ile ka kwa Segalontšu sel a se re, ‘Etlang go Nna, lena bohole bao le katanago gomme le imelwa gagolo. Ke tla le fa khutšo.’”

⁶⁶⁴ Ka kgonagalo nka se tsoge ka kwa leo ka tlhagong boka A le boletše nako yela, eupša ke nyaka go Mo kwa a re, “Le ke letšatši la mafelelo. Go dirilwe gabotse, mohlanka wa Ka yo mobotse le go tshepega, bjale tsena mathabong a Morena ao a lokišeditšwego wena.” Ge e sa le botelele gakaakang?

⁶⁶⁵ “Ge e sa le o phološwa?” Aowa ngwanešu.

⁶⁶⁶ “Ge e sa le motheong wa lefase, ge ke go bone le go go tsebelapele, gomme ka go beela go Bophelo bjo Bosafelego,” o be o šegofaditšwe nako yeo. “Bohole bao A ba tsebilegopele, O ba biditše.” A yeo ke nnene? [Phuthego e re, “Amene.”—Mor.] “Bohole A ba biditšego, O ba lokafaditše. Bale A ba lokafaditšego, O šetše a ba tagafaditše.” Ke lena bao. O re tsebetšepele, a re bitša, a re lokafatša, gomme re šetše re tagafaditšwe le Yena, mo bofelong bja lefase, re ya go moputso wa rena. A ga la thaba? [“Amene.”]

Kgonthe, go tla go dira O mo rate. Mola o be o sa kgone go ka ikhola wenamong, gomme Yena šo o etla gomme o go diretše seo.

⁶⁶⁷ Go Šegofala Go Be Setlemi Sela Sa Go Tlemaganya, Kgaetšedi Gertie. “Dipelo tša rena ka lerato la Bokriste,” ge re sa ne kopanelo ye nnyane ye fa ya tumišo bjale, morago re ya go rapelela balwetsi. Modimo a le šegofatše. Lena ba le phagamišeditšego diatla tša lena go Kriste mosong wo, hwetšang lefelo go rapela, Mo hlankeleng.

⁶⁶⁸ Bjale, a re no Mo tumišang bjale, bjalo ka phuthego, lena bohole Mamethodist, church of God, Assemblies of God, Mapresbyterian, Malutheran, Katoliki. Bohle mmogo bjale, a re opeleng bjale.

Go šegofala go be setlemi sela sa go tlemaganya
Dipelo tša rena ka lerato la Bokriste;
Kopanelo ya monagano wa leloko
E swana le yela ya Godimo.

Pele ga terone ya Tate wa rena,
Re tšholla thapelo ya rena ya phišego;
Dipoifo tša rena, dikhofelotša rena, dinepo
tša rena, di tee,
Khomotšo ya rena le pelaelo ya rena.

Ge re arogana,
Go re fa bohloko bja ka gare;
Eupša re sa tlo be re bofagane . . .

Ke ba ba kae Mamethodist, Mabaptist, le bohole?

Le go holofela go kopana gape.

⁶⁶⁹ A seo ga se le dire gabotse? A re retologeng gomme re šikenyeneng seatla sa rena seng bjale, ge re sa e opela gape.

Pele . . .

Šikinya diatla, yo mongwe ka morago ga gago, ka pele ga gago, lehlakore e ka ba lefe.

. . . terone
Re tšholla thapelo ya rena ya phišego;
Dikhomotšo tša rena le dipelaelotša rena.

Bjale ge re arogana,
Re tla ratana seng.

Go fa . . .

Duma tirelo e ka ya pele? Le a bona? Ke ka fao re naganago.

. . . teng bohloko;
Eupša re sa tlo be re bofagane ka dipelong (ka
go e tee)
Le go holofela go kopana gape.

Ge e se fa gape, go Letšatši lela le legolo re tla kopana.

⁶⁷⁰ Bjale, Tate, amogela thapelo ya rena mosong wo. Tšea Lentšu gomme o Le bjale ka dipelong tša badumedi. Anke ba se no tšewatšewa, gomme godimo lehono gomme tlase gosasa, eupša anke Mantšu a a hwetše lefelo la ona la bokhutšo ka pelong ya modumedi yo mongwe le yo mongwe. Go tseba se, gore, "Modimo o enne ka keno, gomme go ne dilo tše pedi tša go se fetoge. Go se fetoge ga Modimo, ke gore, ga go kgonagale go Modimo go aketša, gore bajabohwa ba phološo ye ba ke ba be le kholofelo ye ya go tia, go tia le kgontha, sekgwaparetši ka soulong." Go tseba se, gore, "Modimo o re tshepišitše, ka keno e ennwego. E tee, gore A ka se aketše; ye nngwe, O enne keno godimo ga yeo, gore O tla re tsoša letšatšing la mafelelo le go re fa Bophelo bjo Bosafelego." Go tsebeng, gore, "Ka morago ga ge re biditšwe, gore O boletše gore O re tsebile pele ga motheo wa lefase, gomme o re kgethetšepele go peong ya bana ka Jesu Kriste. Gomme O re tsebilepele. O re biditše. Gomme ge A re biditše, O re lokafaditše." Re ka se kgone go itokafatša renabeng, kafao O re lokafaditše ka lehu la Morwa wa Gagwe Mong. "Bao A ba lokafaditšego, O šetše a ba tagafaditše." Lentšu šetše le boletše. Gomme re no ba tseleng ya rena, re sepela mmogo, re hlalala tseleng ya rena go ya Letagong.

⁶⁷¹ Efa batho tumelo, gomme anke metlwae ye mennyan le dilo tše di lekeletšego go batho, anke di hlohlorege go tloga go bona, mosong wo, ka Lentšu le la Modimo leo e lego sekgwaparetši sa soulo, go tia le kgontha. Anke ba hlohlore go tloga go mekgwa ya bona, dibefedi tša bona. Le dilo tše di bego... Boka Paulo a boletše, ka karolong ya pejana ya molaetša matšatšing a se makae, "A re beeleng thoko boima bjo bongwe le bjo bongwe, le sebe seo gabonolo se re nyamišago, gore re ke re kitime ka kgotlelelo lebelo leo re le beetšwego pele; go lebeleleng go mothomi le mophethi wa tumelo ya rena, Jesu Kriste, Yo a lekilwego ka mekgwa yohle boka re le, golebjale ntle le go dira sebe." O ile a dumelwelwa go lekwa, eupša ga sa nke A šetše teko. Gomme re lekwa go dira sebe, eupša go se tsoge ra šetše. Gobane Bophelo bjo bo lego ka gare ga rena ke sekgwaparetši sa boyo bja rena bja Gosafelego, gomme re swara bjoo bokgethwa go pelo ya rena.

⁶⁷² Bjale, go ne ba bantsi bao Sathane a ba hlasetšego ka matshwenyego. Re lokela go ba rapelela, Tate. Anke bona, ge ba feta hleng ka tlase ga Lentšu la Modimo lehono... Lentšu lela le bohlokwa leo le rerilwego, Beibele e fa bohlatse, Barongwa ba Modimo ba eme kgauswi, gomme Moya wo Mokgethwa wo mogolo, wohle godimo, o eme fa go fa bohlatse go Lentšu. Bjale, Tate, ge ba feta ka tlase ga Lentšu la tshepišo, mosong wo, anke ba ye go tloga fa ba fodile. Go tloša dikota tša bona, go tlogela ditulo le—le malawana ao ba robetšego go ona, gomme go no fodišwa. E fe, Morena. Anke ba bowe go tirelo ya go latela yeo ba dumelitšwego go tla, goba go dikereke tša bona beng, ba hlalala,

ba bontšha ke dilo dife tše kgolo Kriste a di dirilego. Se re se dira bakeng sa letago la gago, Leineng la Jesu. Amene.

⁶⁷³ Ke ba go kgopela tshwarelo bakeng sa tshepišo yeo ke e dirilego, gore mosong wo re tla ba le tema ya 7, eupša ga se ke fihle go yona. Gomme re swanetše go dumelala nako ye nnyane fa bakeng sa—bakeng sa wo, bakeng sa mothalo wa thapelo. Gomme bjale, bosegong bjo, Morena ge a rata, re tla tšeа tema ya 7, le go hwetša Melekitsedeke yo e be e le Mang. Ka ba bakae ba tla ratago go tseba? Oo, re no ya go ya thwi tlase go Yena, go hwetša feela tlwa Yena ke Mang. Gomme Lengwalo le bolela Yena ke Mang. Le a bona?

⁶⁷⁴ Gomme Scofield o rile e be e le “boprista.” Go kgonega bjang go ba boprista, go hloka mathomo goba bofelo? Le a bona, e be e se boprista. E be e le Motho, Melekitsedeke (Leina), Motho.

⁶⁷⁵ Boka, e sego go nyenyefatša, eupša Christian Science e re Moya wo Mokgethwa ke “kgopoloo.” Gomme Beibele e rile, “Yena, Moya wo Mokgethwa.” Gomme Yena ke lešalašala. Ke Motho; e sego kgopoloo. Ke Motho. Ka nnete.

⁶⁷⁶ Gomme Melekitsedeke ke Motho, Motho Yo a sa bago le mathomo a matšatši goba bofelo bja mengwaga. Ga se A be ga ešita le tate goba mme, goba moloko. Gomme re tla hwetša Yena ke Mang, Morena ge a rata, bosegong bjo, ka Lentšu. A le a Le rate? [Phuthego e re, “Amene.”—Mor.] Oo! “Lentšu la Gago ke lebone tseleng ya ka le dinaong tša ka.” Oo!

⁶⁷⁷ Bjale, o re, “Ngwanešu Branham, ga ke E kwešiše yohle.” Ga ešita ga ke dire.

⁶⁷⁸ Eupša, nako ye nngwe, ke be ke rera tlase ka Kentucky. Gomme go ba bangwe ba bosetlaboswana, le Katoliki le tša go fapano, ba ba ka se kwešišego ka fao tše tša go teba, dilo tša go huma tša Lengwalo. Ke be ke rera ka phodišo Kgethwa. Mosetsana wa go se apare dieta o tlišitše . . . O be a se bogolo bja mengwaga ye lesometlhano, o bile le lesea le lennyane, gomme le be le ne palsy. Ke rile, “Bothata ke eng, kgaetšedi, ka lesea la gago?”

⁶⁷⁹ O rile, “Le ne metlhakgaselo.” Ga se a tsebe go re, palsy. Ga se a tseba a e bitše eng.

⁶⁸⁰ Selo se sennyane ka kgonagalo ga sa nke sa ke sa rwala para ya dieta, bophelong bja gagwe. Moratiwa wa monnatsoko, moriri wo motelele o lekeletše tlase. Ke rile, “A o a dumela?”

⁶⁸¹ Gomme ona a mannyane, mahlo a masehlana a ntebeletše. O rile, “Ya, mohlomphegi. Ka kgonthe ke a dumela.”

⁶⁸² Ke tšere lesea le lennyane. Gomme ge ke be ke le rapelela, le tlogetše go tlhakgasela. Uh-huh. Gomme le ile ntle, ile ntle.

⁶⁸³ Letšatši la go latela, ke be ke ile go tsoma sehlorwana, godimo ka lehlakoreng la thaba. Ke kwele monna yo mongwe a dutše fale a bolela, saga ya kgale e bobola. Gomme ke ngwegetše

tlase. Ke be ke tsoma sehlorwana. Ba be ba bolela ka nna, ba dutše fale, ba sohla motšoko le go tshwa. Matlakala a fofa, ka mokgwa woo. Gomme ba be ba bolela ka, bjale, ka kopano bošego pele. Yo mongwe wa bona o rile, “Ke bone lesea lela. Ke fetile fale, mosong wo. Ga le sa tlhakgasela, golebjalo mosong wo.” Le a bona? O rile, “Yela e be e le kgontha.” Gomme o be a etshwa.

⁶⁸⁴ Gomme ba bile le dirabarole di ithekgle ka mohlare, kafao ke naganne bokaone ke itsebiše. Le a tseba, ba ne dikgogakgogano tlase fale, le bona. Kafao, ke sepeletše godimo. Ke rile, “Moso o mobotse, baena.”

⁶⁸⁵ Moisa yola yo mogolo bogolo, a bonagetše go bolela, o bile le mosohlo wa motšoko ka molomong wa gagwe, ka mokgwa *woo*, ntentle ka thoko ka mokgwa *woo*, le o mogolo, molala o motelele. Gomme o be a rwele kefa ye kgolo bogolo, e gogetše tlase godimo ga sefahlego sa gagwe. O lebeletše gohle gomme o mpone. O obeeditše gomme o tšere kefa yela, a e hlothola, o ile . . . [Ngwanešu Branham o a metše—Mor.] O meditše motšoko wola wa go sohlwa, o rile, “Moso o mobotse, moruti.” Le a bona? Ee, mohlomphegi. Tlhompho. Gomme yeo ke nnete. Ka fao a phetše godimo ga yona, ga ke tsebe, eupša o dirile.

⁶⁸⁶ Kafao, bošegong bja go latela, go tleng morago, go bile le monna fale yo a nyakilego go ngangišana le nna gannyan nthathana. Ke ile kerekeng yeo e bego e sa dumele go phodišo Kgethwa. Kafao, ye e be e le kereke ya Methodist, White Hill, Kentucky. Kafao o—o ile go . . . O be a eme ka ntle. O be a swere lantere ka seatleng sa gagwe. Gomme o rile, “Ke nyaka go bolela se sengwe, moreri. Ke no se kgone go amogela Yeo, gobane ga ke kgone go E bona.”

⁶⁸⁷ Ke rile, “Ga o kgone go E bona?”

⁶⁸⁸ O rile, “Aowa.” O rile, “Ke motho wa go lwala, nnamong. Eupša,” o rile, “ke no se kgone go E bona.”

Ke rile, “O dula kae?”

O rile, “Morago godimo go Big Renox.”

Ke rile, “Gabotse, o ya go fihla gae bjang?”

O rile, “Gabotse, ke ya go sepela go ya gae.”

Ke rile, “A o kgona go bona legae la gago?”

O rile, “Aowa, mohlomphegi.”

Ke rile, “Ke leswiswi gampe bošegong bjo, go maru.”

O rile, “Ee.”

Ke rile, “O ya gae bjang?”

O rile, “Ka lantere ye.”

Ke rile, “Lantere ga e bontše seetša tsela yohle go ya go ntlo.” Ke rile, “O ya bjang?”

O rile, “Oo, ke sepela ka lantere.”

⁶⁸⁹ Ke rile, “Ke yona. O ne seetša sa lantere bjale, gomme nako ye nngwe le ye nngwe o tepogela ka tsela *ye*, seetša se tla fela se bontšha pele ga gago. Ge o no tšwelapele o sepela, seetša se tla tšwelapele se sepela le wena.”

⁶⁹⁰ Gomme o a dira mosong wo, o nyaka Kriste, Moprista Mogolo yo mogolo, Mmoelanyi bakeng sa bolwetši bja gago, goba bolwetši bja gago, goba soulo ya gago. O ka no se E kwešiše. Ga re dire. Eupša re laetšwe go “Sepela Seetšeng boka A le Seetšeng.” O dira kgato e tee ka Seetšeng. Gomme ge o ne Seetša le wena, Seetša se tla phadimela go letšatši le le phethagetšego. Le tla boloka seetša pele ga gago.

Gomme re tla sepela godimo ga tselalepheto ye
botse ye ya kgale,
Go anega mogohle re yago,
Bokaone ke be Mokriste wa nako ya kgale,
Morena,
Go feta e ka ba eng ke e tsebago.

Le kile la kwa pina yeo?

Ga se gona boka Mokriste wa nako ya kgale,
Lerato la Bokriste go bontšha;
Re sepela ka go tselalepheto ye botse ya kgale,
Gomme re anega mogohle re yago,
Bokaone ke be Mokriste wa nako ya kgale,
Morena,
Go feta e ka ba eng ke e tsebago.

⁶⁹¹ Ke no e rata. Go lokile. Bjale re ya go rapelela balwetši. Ga re . . . Ga re tleleime gore re kgona go fodiša balwetši. Ge eba re dirile, re tla be re bolela se sengwe sa phošo. Motho yo mongwe le yo mongwe a babjago fa o šetše a fodišitšwe. Seo ke se Lengwalo le se boletšego. “Ka megogoma ya Gagwe re fodišitšwe.” A ke nnete? [Phuthego e re, “Amene.”—Mor.]

⁶⁹² Modiradibe yo mongwe le yo mongwe yoo a lego ka fa, ge go ka direga go ba o tee, o pholositišwe ge e sa le Jesu a ehwa. Eupša o se tsoge wa hwa fa moo monyetla wa gago o beilwego pele ga gago, go ya ka Bogoneng bja Gagwe gona go leka go E amogela. E diretšwe bjale. Gonabjale o swanetše o E amogelete. Ge o ka ya mošola wa Madi, gona ga o selo eupša . . . O šetše o ahlotšwe, gobane o ahlotšwe ka tsela yeo o swarago Poelano ya Morena Jesu Kriste. Le a bona? O . . . o a ikahlola fao.

⁶⁹³ “Kafao O gobaditšwe bakeng sa dikarogo tša rena, gomme ka megogoma ya Gagwe re fodišitšwe.” Kafao, ga se gona nka bago le sona, go go fodiša. Ga se gona kereke e ka bago le sona, go go fodiša. Selo se nnoši re ka rapelela se, gore tumelo ya gago e se palelwe, gore o tla tla go aletara mosong wo go amogela Kriste bjalo ka Mophološi wa gago, bjalo ka ge o dirile bakeng sa Mophološi wa gago. Gomme ntle le ge e ka ba . . . Modimo o dira

mehlolo. O bontšha leswao le legolo. Sefofu, sefoa, semumu, se sengwe le se sengwe, ba fodišitše thwi fa mo tabarenekeleng. Eupša ge eba ke yona goba aowa, re a E amogela, golebjalo. Makga a mantši dilo tšela di ka dipono.

⁶⁹⁴ Ke ba bakae ba bilego fa e ka ba Malamorena mararo a go feta, goba a mane, ge monna a etla ka fa, bobedi go foufala le go repha ditho, goba a dutše ka setulong ka mogalatšika wa go se lekalekanywe? Gomme pele ke tloga gae, ke mmone ponong, “Gore go tla ba le monna fale, moriri wo moso, o ba wo mopududu. Mosadimogatša wa gagwe ke mosadi wa go bogega go kgahliša, a ka ba bogolo bja mengwaga ye masometshela. O tla tla gomme o tla be a lla,” gomme o tla nkgopela. “Le go tla morago le go rapelela monnamogatša wa gagwe.” O dutše thwi fale.

⁶⁹⁵ Gomme ke tla tlase. Ke rile go baena ba bangwe ba ka fa, “Šetšang ye.”

⁶⁹⁶ Gomme ge re ile tlase aletareng, ba bangwe ba be ba rapetše. Ge ke ile go rapela, ke sepeletše thwi kgole gomme ka tla morago godimo fa. Gomme mosadimogatša wa gagwe o phagamile gomme a tla feela tlwa ka tsela ye Morena a rilego go tla ba. Batho ba bogetše, go bona ge eba e tla direga ka tsela yela. Ga sa nke ya ke ya šitwa. Gomme kafao ge a sepetše . . .

⁶⁹⁷ Ka tla go hwetša, monna yola, Ngak. Ackerman, tlase ka Birdseye, Indiana, e be e le yena a mo rometšego godimo fa; yo a lego Mokatoliki, gomme mošemane wa gagwe ke moprista ka monastering fale ka Saint Meinrad. Gomme Ngak. Ackerman ke modirišane wa ka wa go tsoma, gomme o rometše monna godimo fa. Gomme Morena o mpontšhitše monna wa hlogontsho yoo a tla mo romelago, eupša ke be ke sa tsebe o be a le mang.

⁶⁹⁸ Ke rile, “A yola e be e le Ngak. Ackerman?”

⁶⁹⁹ O rile, “E bile.” Le a bona? Gomme morago monna . . .

⁷⁰⁰ Ke rile, “Ke O RIALO MORENA.” Ke sepeletše tlase. Ke rile, “Mohlomphegi, emeleta.” Bobedi go foufala gomme a sa kgone . . . o . . . Mo—mo mogalatšika wa balance o be o ile. Ga se a kgone go ikokotlela yenamong godimo ka mokgwa woo. Le a bona? O bile ka tsela yela lebaka la mengwaga, o bile go ba ga Mayo le gohle go dikologa. Gomme ka no rapela thapelo bakeng sa gagwe, gomme o phagamile. Šole o ile, a sepelela tlase go kgabola.

⁷⁰¹ Sa pele o rile, “Ga ke kgone go go bona.” Morago o goeleditše, “Ee. Ke a kgona.” Mahlo a gagwe a ponyologile fale. Yena go beng orthodox, mosadimogatša wa gagwe Mopresbyterian.

⁷⁰² Batho ba bangwe ba nagana gore “Mopresbyterian ga a goelele, le Moorthodox.” Le ka be le ile la ba kwa. Kgonthe. Ba be ba goelela le go gokarelana seng. O tla morago gomme o tšere setulo sa gagwe sa bagolofadi, gomme o sepeletše pele ntle le

go theoga ditepisi, feela boka motho e ka ba ofe yo mongwe, o kgonne go bona le go bolela le—le go ya pele.

⁷⁰³ Ke bile le lengwalo go tšwa go yena, goba o leditše, letšatši le lengwe. Ke a dumela, Ngwanešu Cox o ile go yena. O rile, “Mahlo a gagwe a bile le maikutlo a go swa.” Ka kgonthe. Ke mogalatšhika, megalatšhika ya leihlo e hloga le go bowa morago bophelong, le a tseba, le go tšea lefelo la ona. Thogako e be e tlošitšwe.

⁷⁰⁴ Ge o ka dumelela tlhago go ba le tsela ya yona, ge go se selo se šitišago tlhago, gona e tla—e tla ba le taolo ya go tlala. Ge o ne pantiši go raretša letsogo la gago, o thibetše kelelo, seatla sa gago mafelelong se tla hwa. Bjale, ka gobane, ka tlhago, go tla loka ge o ka no le tlogela le nnoši. Eupša se sengwe se tsenatsene tlhago. Gona, ge o sa kgone go e bona, ga go tsela go ngaka go e swara. Ke feela dilo tše pedi a ka šomago ka tšona: se a kgonago go se bona, se a kgonago go se kwa. Ke selo se nnoši a ka šomago ka sona: se a se bonago le se a se kwago.

⁷⁰⁵ Ge a sa kgone go se bona, gona e swanetše go ba sa moya. Gona go ne, selo se nnoši se kgonago, selo se tee se ka diregago; re a rapela, Kriste o tloša thogako, o raka diabolo, gomme seo se thoma go ba sekeng, gabotse. A fola, gomme ke sohle se lego go yona. “Ba tla lelekela bodiabolo ntle ka leina la ka.” A yeo ke nnete? Ke tshepišo go kereke. Ke tshepišo ya maatla. Eng? Ke, ke Bogona bja Gagwe le rena. Bjale, ke eng e re dirago go beng go phethagala mosong wo, go dira dilo tšela feela boka A dirile, ke ka gobane re sa le ka go seširo. Le a bona? Eupša re ne maikutlo a rilego fale ao a re botšago, “Oo, ee.” Le a bona?

⁷⁰⁶ Gomme ge o amogela phodišo ya gago, ga go kgathalege se seširo se se bolelago, ke se Lentšu le se boletšego. Le a bona? Yeo ke yona. Yeo ke yona. Gomme le—le—le Lentšu ka mehla le ka godimo ga se sengwe le se sengwe. Lentšu la Modimo la Gosafelego!

⁷⁰⁷ Lebelelang Sarah, popelo ya gagwe e hwile, bogolo bja mengwaga ye masomesenyane, o phetše le monnamogatša wa gagwe ge e sa le a be a ka ba lesometshela goba lesomešupa, go se bana; Abraham, lekgolo. Modimo o retologile thwi go dikologa le go ba fa lesea. Le a bona? Gobane, ba dumetše. Ba biditše dilo tšela di bego di se gona, o ka re di be di le gona. Tsena ka tsela yeo mosong wo, mogwera.

⁷⁰⁸ Gomme bošegong bjo, re letile . . . Ge eba bohole le re etetše, re thabile go ba le lena fa mosong wo. Gomme Modimo a be le lena. Gomme ge eba o ka toropongkgolo bakeng sa mantšiboa, re tla thaba go ba le wena mantšiboeng a go tirelo ye ka moka, ya Melekitsedeke. Gomme gona ge o se, gomme o ne kereke ya gago mong, o ye kerekeng ya gago mong. Leo—leo ke lefelo la gago la mošomo. Ge o le wa kereke, o ye fao. Ye e no ba tabarenekele ye

nnyane moo re bokanago ka fa le go ba le kopanelo rena seng. Bjale, Morena a le šegofatše.

⁷⁰⁹ Gomme Kgaetšedi Gertie o tla re ralokela, *Matwetwe Yo Mogolo Bjale O Kgaušwi*. Gomme a go ne e ka ba ofe fa go rapelelwa? Phagamiša seatla sa gago, bao ba nyakago go tla mothalong wa thapelo, go bea tumelo ya lena go Kriste. Go lokile. Ge le ka lokologana go lehlakore *le la kereke*, ge le rata. Gomme ge ba ka gogela setulo tlase feela gannyane nthathana, ngwanešu, ge o rata, gore re kgone go ba le sekgoba se sennyane ka fale gomme ra kgona go tliša magagešo go kgabola. Etlang godimo go lehlakore *le*.

⁷¹⁰ Gomme re ya go rapela bjale, ge re opela. Gomme ke ya go kgopela bagolo fa, ba kerekeleina goba kereke efe, go sa kgathale ba eng e lego, ge o dumela go phodišo Kgethwa, a o ka ema fa le nna mo sefaleng se, go rapelela balwetši? Re tla thakgala go ba le lena. Kerekeleina e ka ba efe, goba go se kerekeleina, goba e ka ba eng o lego, re tla thakgala go ba le wena. A o ka no tla bjale, bakeng sa thapelo? Etla godimo gomme oeme le nna.

Ngwanešu Neville, ge o ka tla le oli.



BAHEBERE, TEMA YA BOTSHELELA ³ NST57-0915M
(Hebrews, Chapter Six ³)
SERISI YA PUKU YA BAHEBERE

Molaetša wo ka Ngwanešu William Marrion Branham, setlogong o abilwe ka Seisimane ka Lamorena mosong, Setemere 15, 1957, ka Tabarenekeleng ya Branham ka Jeffersonville, Indiana, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye ya North Sotho phetolelo e ngwadilwe gomme ya phatlalatšwa ke Voice Of God Recordings.

NORTH SOTHO

©2021 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriſte. Puku ye e ka se kgone go rekišwa, go tſweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditſhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org